



REPUBLIKA E SHQIPËRISË

KËSHILLI I EMËRIMEVE NË DREJTËSI

V E N D I M

Nr. 16, datë 17.06.2025

**PËR LEJIMIN E KANDIDIMIT TË ZOTIT ALBAN TORO NË VENDIN VAKANT,
PËR GJYQTAR NË GJYKATËN KUSHTETUESE, SHPALLUR NGA GJYKATA E
LARTË MË DATË 11.12.2024**

Këshilli i Emërimeve në Drejtësi, i përbërë nga:

Sokol Sadushi	Kryetar
Marjana Semini	Zëvendëskryetare
Ilir Toska	Anëtar
Alma Muça	Anëtare
Elvana Çiçolli	Anëtare zëvendësuese
Enkela Vlora	Anëtare relatore
Irma Balli	Anëtare
Genti Xholi	Anëtar zëvendësues
Besart Kaçkini	Anëtar zëvendësues

Asistuar nga sekretare Ermelinda Kadiu, në prani të Avokates së Popullit, në prani të përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve, në mbledhjen e datës 17.06.2025, mori në shqyrtim çështjen që i përket:

KANDIDATIT: Alban Toro

OBJEKTI: Kandidim për gjyqtar në Gjykatën Kushtetuese në vendin vakant të shpallur nga Gjykata e Lartë më datë 11.12.2024.

KËSHILLI I EMËRIMEVE NË DREJTËSI

Pasi dëgjoi relatimin e anëtares së KED-it, zonjës Enkela Vlora, lidhur me mënyrën e procedimit të ndjekur për verifikimin e kandidatit, dhe si bisedoi çështjen në tërësi,

VËREN:

I. Informacion i përgjithshëm mbi kandidaturën dhe caktimin e relatorit

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

1. Në zbatim të nenit 125 të Kushtetutës dhe të pikës 1 të nenit 7/ç të ligjit nr. 8577/2000 “Për organizimin dhe funksionimin e Gjykatës Kushtetuese në Republikën e Shqipërisë”, i ndryshuar (në vijim ligji nr. 8577/2000), më datë 11.12.2024, Gjykata e Lartë ka shpallur hapjen e procedurës së aplikimeve për plotësimin e vendit vakant, të krijuar në Gjykatën Kushtetuese, pas deklarimit të mbarimit të mandatit të gjyqtarës Holta Zaçaj.

2. Në përfundim të afatit të procedurës së aplikimeve për shprehjen e interesit për kandidim, Gjykata e Lartë i ka dërguar Këshillit të Emërimeve në Drejtësi (në vijim KED), listën e kandidatëve që kanë shprehur interes për këtë vend vakant në Gjykatën Kushtetuese, në të cilën përfshihej dhe kandidati Alban Toro, së bashku me dokumentacionin e paraqitur prej tyre, për përmbushjen e kushteve dhe kriterëve ligjore të përcaktuara në nenin 7/a të ligjit nr. 8577/2000.

3. Në datë 15.01.2025, KED realizoi procedurën e shortit për përzgjedhjen e anëtarit relator dhe të këshilltarit ligjor për këtë vakancë, sipas nenit 228 të ligjit nr. 115/2016 “Për organet e qeverisjes së sistemit të drejtësisë”, i ndryshuar, pikës 4 të vendimit nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, i ndryshuar (në vijim vendimi nr. 4/2019 i KED) dhe vendimit të KED nr. 2 datë 15.02.2019 “Për procedurën e shortit të caktimit të relatorëve për pozicionet vakante në çdo institucion”, i ndryshuar. Me anë të kësaj procedure, relatore për këtë vakancë u përzgjodh anëtarja Enkela Vlora, ndërsa këshilltare ligjore Sonila Hoxha.

4. Në datë 17.01.2025, kandidati Alban Toro u njoftua me shkrim, në rrugë elektronike për t’u paraqitur brenda tre ditëve në zyrën e posaçme të KED për tërheqjen e formularëve standard dhe të udhëzimeve të nevojshme për vijimin e procedurës së verifikimit të kandidimit të tij. Ky njoftim u krye në zbatim të pikës 22 të vendimit nr. 4/2019 të KED. Gjithashtu në zbatim të detyrimeve ligjore të parashikuara në ligjin nr. 115/2016 “Për organet e qeverisjes së sistemit të drejtësisë” i ndryshuar, si dhe vendimin nr. 4, datë 11.3.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe Inspektorit të Lartë të Drejtësisë”, i ndryshuar, kandidati Alban Toro i është njoftuar dhe emri i relatores dhe këshilltares së caktuar.

5. Në datë 17.01.2025, kandidati Alban Toro u paraqit pranë KED dhe tërhoqi për plotësim formularët standard të deklarimit dhe autorizimet e duhura për procedurën e aplikimit për plotësimin e vendit vakant, objekt i kësaj procedure verifikimi, midis të cilave edhe ato për deklarimin e pasurisë dhe interesave financiarë.

6. Në datë 20.01.2025, kandidati Alban Toro në rrugë elektronike, konfirmoi marrjen e njoftimit dhe deklaroi se nuk ka dijeni për shkaqe papajtueshmërie si me relatoren dhe këshilltaren. Gjithashtu, kërkoi informacion lidhur me mundësinë e marrjes elektronikisht të autorizimit të skanuar të personit të lidhur me studime jashtë shtetit (vajzës E.T) për shkak të kohës që nevojitet për dërgimin dhe marrjen nëpërmjet shërbimit postar. Po në këtë datë, kandidati Alban Toro, i është bërë me dije se ky autorizim duhet të paraqitet me nënshkrimin e personit të lidhur në zyrën e Këshillit që gjendet në selinë e Gjykatës së Lartë dhe jo i skanuar në postë elektronike, duke i lënë një afat shtesë 5 ditor nga përfundimi i afatit të parë. Në datë 21.01.2025, kandidati Alban Toro është paraqitur pranë KED për dorëzimin e autorizimeve dhe deklarimeve përkatëse, ndërsa në datë 30.01.2025 ka paraqitur autorizimin për verifikimin e pasurisë të nënshkruar nga personi i lidhur (vajza E.T). Ky autorizim rezulton se është dërguar nëpërmjet shërbimit postar nga jashtë shtetit në datë 21.01.2025.

Këshilli i Emërimeve në Drejtësi 2025

Adresa Postare : *GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.*

Adresa Elektronike : info@ked.gov.al Numra telefonikë : **+355 4 2257302**

II. Verifikimi i kushteve dhe kriterëve kushtetuese dhe ligjore të kandidimit

A. Procesi i deklarimit dhe kontrolli i pasurisë së kandidatit dhe familjarëve të tij sipas ligjit.

7. Për llogaritjen dhe ndjekjen e zbatimit të afatit të parashikuar në pikën 2 të nenit 235 të Ligjit nr. 115/2016, të nenit 7/a pika 1 germa “dh” të ligjit nr. 8577/2000, si edhe në zbatim të pikës 60 të Vendimit të Këshillit të Emërimeve në Drejtësi me nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, me shkresën nr. 64 prot., datë 29.01.2025, Këshilli i ka dërguar, Inspektoratit të Lartë të Deklarimit dhe Kontrollit të Pasurive dhe Konfliktit të Interesave (në vijim ILDKPKI), listën e kandidatëve dhe personave të lidhur me ta që i nënshtrohen procesit të kontrollit të pasurive, interesave financiarë dhe konfliktin e interesave, sipas ligjit nr. 9049, datë 10.4.2003 “Për deklarimin dhe kontrollin e pasurive, të detyrimeve financiare të të zgjedhurve dhe të disa nëpunësve publikë”, i ndryshuar (në vijim ligji nr. 9049/2003) dhe ligjit nr. 9367, datë 7.4.2005 “Për parandalimin e konfliktit të interesave në ushtrimin e funksioneve publike” (në vijim ligji nr. 9367/2005).

8. Bashkëlidhur kësaj shkrese të drejtuar ILDKPKI, ndërmjet të tjerave, është përcjellë dhe “Deklarata” e nënshkruar nga kandidati Alban Toro, në të cilën tregohet/konfirmohet se është pajisur me formularët përkatës të deklarimeve dhe autorizimet që duhet të plotësohen për qëllimet e procedurës së verifikimit të kandidaturës së tij dhe që mban datën 17.01.2025 të nënshkrimit, nga e cila fillojnë të llogariten afatet e përcaktuara nga ligji për përmbushjen e detyrimeve ligjore të kandidatit për procedurën e verifikimit të kandidaturës.

9. Në zbatim të nenit të nenit 235, pika 2 të ligjit nr. 115/2016, të nenit 7/a, pika 1, shkronja “dh” të ligjit nr. 8577/2000, dhe pikës 61 të vendimit nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, si dhe përcaktimeve të neneve 3/1, 4, pika 2 e vijues të ligjit 9049/2003, kandidati Alban Toro ka plotësuar në mënyrë elektronike dhe ka dorëzuar të printuar e nënshkruar, brenda 15 ditëve, pranë ILDKPKI, Deklaratën e Pasurisë dhe Interesave Privatë e kandidatit për pozicione të ndryshme në institucionet e sistemit të drejtësisë, të konfirmuar nga kjo e fundit me shkresën nr. 766/1 prot., datë 17.02.2025.

10. ILDKPKI, në zbatim të ligjit nr. 9049/2003 dhe ligjit nr. 9367/2005, si dhe të nenit 235 të ligjit nr. 115/2016 dhe vendimit nr. 4 të datës 11.03.2019 të KED, pasi ka kryer verifikimin e vërtetësisë dhe të saktësisë së të dhënave që përmbahen në deklaratën e pasurisë dhe interesave private të këtij kandidati, ka përcjell aktin e kontrollit të plotë të Deklaratës së Pasurisë dhe Interesave Privatë e kandidatit për pozicione të ndryshme në institucionet e sistemit të drejtësisë, Alban Toro për Gjyqtar në Gjykatën Kushtetuese, me nr. 18/25 prot., datë 21.05.2025, ku është konkluduar se, për kandidatin Alban Toro:

- a) deklarimi është i saktë në përputhje me ligjin,
- b) ka burime financiare të ligjshme për të justifikuar pasurinë,
- c) nuk ka kryer fshehje të pasurisë,
- d) nuk ka kryer deklarim të rremë,
- e) nuk gjendet në situatën e konfliktit të interesave.

B. Procesi i deklarimi dhe kontrolli i integritetit të kandidatit.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

11. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e integritetit, në zbatim të shkronjës “ç” të nenit 7/a të ligjit nr. 8577/2000, të nenit 236 të ligjit nr. 115/2016, si edhe në zbatim të pikës 82 të Vendimit të Këshillit të Emërimeve në Drejtësi nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, me shkresën nr. 66 prot., datë 31.01.2025 dhe shkresën nr. 74, datë 31.01.2025, Këshilli Emërimeve në Drejtësi ka dërguar në Prokurorinë e Përgjithshme për kompetencë formularin e vetëdeklarimit të plotësuar nga kandidati Alban Toro sipas ligjit nr. 138/2015 *“Për garantimin e integritet të personave që zgjidhen, emërohen ose ushtrojnë funksione publike”*.

12. Prokuroria e Përgjithshme, Drejtoria e Marrëdhënieve Juridiksionale me Jashtë, në përgjigjen e kthyer me shkresën nr. 206/11 prot., datë 12.02.2025, ka bërë me dije, Këshillin e Emërimeve në Drejtësi, se: *“...nga kontrolli i kryer në sistemin elektronik IMPRO... i cili përmban të dhëna nga viti 2015 e në vazhdim për shtetasit e tjerë të cituar në shkresën tuaj, nuk rezulton asnjë praktikë e regjistruar në sistemin IMPRO”*.

13. Nga ana e Drejtorisë së Koordinimit Institucional, Sektori i Dekriminalizimit të Prokurorisë së Përgjithshme, me shkresën nr. 206/2 prot., datë 05.02.2025, është bërë me dije, si vijon: *“...Prokuroria e Përgjithshme kryen verifikimin e thelluar të të dhënave të vetëdeklaruar në formularin e plotësuar nga subjekt të këtij ligji, bazuar në kërkesën e bërë brenda 5 ditëve nga organi përgjegjës, për administrimin e formularit të vetëdeklarimit, vetëm për rastet kur ky i fundit, pas shqyrtimit dhe verifikimit paraprak të të dhënave, konstaton se:*

-subjekti/personi nuk ka deklaruar në formular asnjë fakt që ka të bëjë me të kaluarën e tyre penale, por ka indicie mbi bazën e një kërkesë, ose kryesisht kur ka të dhëna apo fakte, përfshirë ato të njohura botërisht për ekzistencën e të dhënave që kanë të bëjnë me....

-subjekti/personi ka deklaruar në formular të dhëna që kanë të bëjnë me rrethanat/faktet e sipërpërmendura dhe se prima facia të dhënat nuk përfshihen brenda sferës së ndalimeve, të parashikuara nga neni 2, i ligjit nr. 138/2015, por e kalon rastin për kontroll të thelluar, për të verifikuar saktësinë e të dhënave të pasqyruara dhe për të konstatuar nëse rrethanat janë të ndryshme dhe se personi është subjekt i ndalimeve, sipas ligjit;

-ka kërkesë të bërë pranë tij, si organ kompetent për verifikim të të dhënave në formularin e vetëdeklarimit të parashikuar në nenin 5 të këtij ligji, nga një prej subjekteve që gëzojnë të drejtën e nismës për verifikimin e të dhënave, sipas nenit 7, të ligjit nr. 138/2015 “Për garantimin e integritetit të personave që zgjidhen, emërohen ose ushtrojnë funksione publike”. Sipas kësaj dispozite, për anëtarin e Gjykatës Kushtetuese, të drejtën e nismës për të kërkuar verifikimin e të dhënave, pranë organit kompetent për verifikim, sipas këtij ligji, e ka 1/10 e deputetëve, Kryetari i Kuvendit, Kryeministri dhe Prokurori i Përgjithshëm.

Në këtë rast, organi përgjegjës dhe kompetent, për administrimin e formularit dhe verifikimin paraprak të të dhënave, në kërkesën për verifikim të thelluar specifikon subjektin e nenit 7 të ligjit nr. 138/2015 që ka kërkuar verifikimin dhe të dhënat, faktet apo rrethanat që përmban kërkesa e tij e që përbëjnë shkak për zbatimin e këtij ligji.....Për sa më sipër, mbështetur në nenet 44, 62 e 64 të Kodit të Procedurave Administrative, ju kërkohet plotësimi i pasaktësive/ të metave brenda njëzetë ditëve. Mosplotësimi i tyre brenda afatit të caktuar përbën shkak për mospranimin e kërkesës”. Në vijim të shkresës nr. 206/2 prot., datë 05.02.2025 të Prokurorisë së Përgjithshme është përcjell nga ky institucion me shkresën nr. 206/21 prot., datë 10.03.2025, vendimi i datës 07.03.2025 “Për mospranimin e kërkesës për verifikim” të të dhënave të plotësuar në zbatim të ligjit nr. 138/2015, në formularin e vetëdeklarimit datë 18.01.2025 për kandidatin Alban Toro.

14. Për verifikimin dhe kontrollin e integritetit të kandidatit Alban Toro, në zbatim të shkronjës “ç” të nenit 7/a të ligjit nr. 8577/2000, të nenit 236 të Ligjit nr. 115/2016, të pikës 84

Këshilli i Emërimeve në Drejtësi 2025

Adresa Postare : ***GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.***

Adresa Elektronike : ***info@ ked.gov.al*** Numra telefonikë : ***+355 4 2257302***

të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, si edhe në zbatim të ligjit nr. 138/2015 “Për garantimin e integritetit të personave që zgjidhen, emërohen ose ushtrojnë funksione publike” dhe Kreut II e V-së të Vendimit nr.17/2016 të Kuvendit të Shqipërisë “Për përcaktimin e rregullave të detajuara mbi zbatimin e ndalimeve të parashikuara në Ligjin Nr.138/2015 “Për garantimin e integritetit të personave që zgjidhen, emërohen ose ushtrojnë funksione publike”, si organi kompetent i administrimit të vetëdeklarimeve dhe zbatimin e ndalimeve për kandidatin, Këshilli i Emërimeve në Drejtësi i ka kërkuar informacion:

- me shkresën nr. 70 prot., datë 31.01.2025, Drejtorisë së Përgjithshme të Burgjeve, e cila me shkresën nr. 1616/1 prot., datë 07.02.2025, ka kthyer përgjigje se: “...rezultojnë pa shënime në sistem...”;
- me shkresën nr. 73 prot., datë 31.01.2025, Drejtorisë së Përgjithshme të Gjendjes Civile e cila me shkresën nr. 1166/1 prot., datë 12.02.2025, ka kthyer përgjigje se: “Nuk ka ndryshime”.
- me shkresën nr. 68 prot., datë 31.01.2025, Drejtorisë së Përgjithshme të Policisë së Shtetit, e cila me shkresën nr. 543/4 prot., datë 10.02.2025, ka kthyer përgjigje se: “Nga verifikimet e kryera rezultoi se shtetasit.... nuk janë ndaluar apo arrestuar në flagrancë nga strukturat e Policisë së Shtetit për kryerjen e ndonjë vepre penale; nuk figurojnë të regjistruar me identitet tjetër; nuk rezultojnë të kthyer deportiv apo të dëbuar nga territori i ndonjë shteti tjetër; nuk rezulton të kenë urdhër kërkimi ndërkombëtar nga ndonjë autoritet gjyqësor i huaj”.

15. Gjatë procesit të verifikimit të kryer në zbatim të nenit 7/a të ligjit nr. 8577/2000, të nenit 236 e nenit 237 të ligjit nr. 115/2016, të pikave 79-87 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, si edhe në zbatim të ligjit nr. 138/2015 dhe Kreut II e V-së të Vendimit nr.17/2016 të Kuvendit të Shqipërisë “Për përcaktimin e rregullave të detajuara mbi zbatimin e ndalimeve të parashikuara në Ligjin Nr.138/2015 “Për garantimin e integritetit të personave që zgjidhen, emërohen ose ushtrojnë funksione publike”, Këshilli i Emërimeve në Drejtësi, për këtë kandidat:

- nuk ka konstatuar asnjë të dhënë apo fakt, indicje mbi bazën e një kërkesë, përfshirë ato të njohura botërisht për ekzistencën e të dhënave që kanë të bëjnë me:
 - dënime penale me vendim të formës së prerë, brenda apo jashtë territorit të Republikës së Shqipërisë;
 - dënime penale me vendim jopërfundimtar nga një autoritet gjyqësor i një shteti anëtar të BE-së, SHBA-ve, Kanadasë, Australisë apo një shteti tjetër të përcaktuar me vendim të Kuvendit;
 - masë sigurimi personal nga një autoritet gjyqësor i një shteti anëtar të BE-së, SHBA-ve, Kanadasë, Australisë, apo një shteti tjetër të përcaktuar me vendim të Kuvendit;
 - urdhër kërkimi ndërkombëtar nga një autoritet gjyqësor i një shteti anëtar të BE-së, SHBA-ve, Kanadasë, Australisë apo një shteti tjetër të përcaktuar me vendim të Kuvendit;

Këshilli i Emërimeve në Drejtësi 2025

Adresa Postare : ***GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.***

Adresa Elektronike : ***info@ ked.gov.al*** Numra telefonikë : ***+355 4 2257302***

- dëbime nga territori i një shteti anëtar të BE-së, SHBA-ve, Kanadasë, Australisë apo një shteti tjetër të përcaktuar me vendim të Kuvendit.
- nuk ka konstatuar të deklaruar në formular të dhëna që kanë të bëjnë me faktet e sipërpërmendura apo të dhëna që *prima facia* të përfshihen brenda sferës së ndalimeve, të parashikuara nga neni 2, i ligjit nr. 138/2015;
- nuk ka konstatuar që të jetë kërkuar, nga një prej subjekteve që gëzojnë të drejtën e nismës, për verifikimin e të dhënave në Formularin e Vetëdeklarimit, sipas nenit 7, të ligjit nr. 138/2015 “Për garantimin e integritetit të personave që zgjidhen, emërohen ose ushtrojnë funksione publike”.

C. Deklarimi dhe kontrolli i kushteve të tjera ligjore

16. Për verifikimin e kushteve dhe kriterëve ligjore të kandidimit, në zbatim të shkronjave “b”, “c” dhe “d” të pikës 1, pikës 2 dhe 3 të nenit 7/a të ligjit nr. 8577/2000, të nenit 237 dhe 240 të Ligjit nr. 115/2016, si edhe në zbatim të pikave 91/93 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli ka shqyrtuar dokumentacionin përkatës të depozituar nga vetë kandidati Alban Toro në momentin e kandidimit pranë organit të emërtesës që ka shpallur vendin vakant, si dhe nga informacionet e siguruar nga KED, zyrtarisht në kuadër të këtij procesi.

i. Kontrolli mbi gjendjen gjyqësore dhe proceset penale të regjistruar ndaj kandidatit (neni 7/a, pika 1 germa “ç” i ligjit nr. 8577/2000)

17. Për verifikimin dhe kontrollin e integritetit të kandidatit Alban Toro sikurse është cituar dhe më sipër në pikën 14 të këtij relacioni, në zbatim të shkronjës “ç” të nenit 7/a të ligjit nr. 8577/2000, të nenit 236 të Ligjit nr. 115/2016, të pikës 84 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi i ka kërkuar informacion, me shkresën nr. 70 prot., datë 31.01.2025, Drejtorisë së Përgjithshme të Burgjeve, e cila me shkresën nr. 1616/1 prot., datë 07.02.2025, ka kthyer përgjigje se: “...rezultojnë pa shënime në sistem...”.

18. Prokuroria e Përgjithshme, Drejtoria e Marrëdhënieve Juridiksionale me Jashtë, me shkresën nr. 206/4 prot., datë 12.02.2025, ka bërë me dije, Këshillin e Emërimeve në Drejtësi, se: “...nga kontrolli i kryer në sistemin elektronik IMPRO.... i cili përmban të dhëna nga viti 2015 e në vazhdim për shtetasit e tjerë të cituar në shkresën tuaj, nuk rezulton asnjë praktikë e regjistruar në sistemin IMPRO”.

19. Në vijim të shkresës nr. 66 prot., datë 31.01.2025 të KED, nga ana e Prokurorisë së Përgjithshme me shkresën nr. 206/44 prot., datë 29.04.2025 është përcjell verifikimi i kryer nga prokuroritë e rretheve, ku evidentohet si vijon:

- Me shkresën nr. 1815/1 prot., datë 25.04.2025, Prokuroria pranë Gjykatës së Shkallës së Parë të Juridiksionit të Përgjithshëm Kukës, lidhur me kandidatin referon: “Nuk rezulton të jetë regjistruar kallzime/referime/procedinte penale; Nuk rezulton i regjistruar në regjistrin e njoftimit të veprës penale si person i dyshuar; Nuk është ndaluar apo arrestuar në flagrance; Nuk i është caktuar ndonjë masë sigurimi personal”

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

- Me shkresën nr. 1068/1 prot., datë 25.04.2025, Prokuroria pranë Gjykatës së Shkallës së Parë të Juridiksionit të Përgjithshëm Dibër, lidhur me kandidatin referon: “... *nuk është në hetim, apo i dënuar për kryerjen e ndonjë vepre penale në Prokurorinë Dibër*”.
- Me shkresën nr. 1383 prot., datë 25.04.2025, Prokuroria pranë Gjykatës së Shkallës së Parë të Juridiksionit të Përgjithshëm Sarandë, lidhur me kandidatin referon: “.. *nuk rezulton në hetim apo i dënuar me vendim të formës së prerë*”.
- Me shkresën nr. 4377/1 prot., datë 28.04.2025, Prokuroria pranë Gjykatës së Shkallës së Parë të Juridiksionit të Përgjithshëm Elbasan, lidhur me kandidatin referon: “nga verifikimet i kryer nga zyra e regjistrat dhe zyra e arkivës nuk rezulton të jetë regjistruar material kallëzues apo procedim penal..”.
- Me shkresën nr. 1297 prot., datë 28.04.2025, Prokuroria pranë Gjykatës së Shkallës së Parë të Juridiksionit të Përgjithshëm Berat, lidhur me kandidatin referon: “*Nuk është nxjerrë urdhër ndalimi; Nuk është kërkuar masë sigurimi personal; Nuk është marrë në cilësinë e të pandehurit apo personit nën hetim; Nuk ka pasur regjistrim të njoftimit të veprave penale; Nuk ka pasur rast të urdhërave ndërkombëtar të ndalimit*”.
- Me shkresën nr. 4233 prot., datë 28.04.2025, Prokuroria pranë Gjykatës së Shkallës së Parë të Juridiksionit të Përgjithshëm Korçë, lidhur me kandidatin referon: “*Nuk ka filluar ndjekje penale dhe nuk janë dënuar me vendim të formës së prerë me kërkesën e kësaj Prokurorie*”.
- Me email të datës 29.04.2025, Prokuroria pranë Gjykatës së Shkallës së Parë të Juridiksionit të Përgjithshëm Lezhë ka referuar se pas verifikimeve të bëra në regjistrat e Prokurorisë pranë Gjykatës së Shkallës së Parë të Juridiksionit të Përgjithshëm Lezhë, nuk rezulton të jenë në hetim, apo jetë dhënë vendim gjykatë jo përfundimtar apo i formës së prerë për kryerjen e ndonjë vepre penale brenda territorit Republikës së Shqipërisë apo jashtë shtetit, në ngarkim të shtetasve sipas listës emërore, cituar në kërkesën.
- Me shkresën nr. 7343 prot., datë 29.04.2025, Prokuroria pranë Gjykatës së Shkallës së Parë të Juridiksionit të Përgjithshëm Vlorë, lidhur me kandidatin referon: “*Nuk ka filluar ndjekje penale dhe nuk janë dënuar me vendim të formës së prerë..*”.
- Me shkresën nr. 2513 prot., datë 28.04.2025, Prokuroria pranë Gjykatës së Shkallës së Parë të Juridiksionit të Përgjithshëm Gjirokastrë, lidhur me kandidatin referon: “*nuk rezulton të jenë në hetim dhe nuk rezulton të jenë dënuar me vendim të formës së prerë për kryerjen e ndonjë vepre penale..*”.
- Me shkresën nr. 1862/1 prot., datë 29.04.2025, Prokuroria pranë Gjykatës së Shkallës së Parë të Juridiksionit të Përgjithshëm Durrës, lidhur me kandidatin referon: “*nuk është regjistruar asnjë procedim penal*”.
- Me shkresën nr. 5380/1 prot., datë 25.04.2025, Prokuroria pranë Gjykatës së Shkallës së Parë të Juridiksionit të Përgjithshëm Fier, lidhur me kandidatin referon: “*Prokuroria nuk ka në hetim apo të jenë dënuar me vendim të formës së prerë..*”.
- Me shkresën nr. 3528 prot., datë 25.04.2025, Prokuroria pranë Gjykatës së Shkallës së Parë të Juridiksionit të Përgjithshëm Shkodër, lidhur me kandidatin referon: “*nuk rezulton të jenë në hetim apo të jenë dënuar me vendim të formës së prerë për kryerjen e ndonjë vepre penale..*”.
- Me shkresën nr. 11061/1 prot., datë 25.04.2025, Prokuroria pranë Gjykatës së Shkallës së Parë të Juridiksionit të Përgjithshëm Tiranë, lidhur me kandidatin referon: “*Nga verifikimi i kryer në indekset e kallëzimeve dhe statistikave të procedimeve penale për*

Kësbilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

periudhën kohore vitet 2022-2025, nuk rezultoi të ketë procedim penal të regjistruar në ngarkim të shtetasve të lartëpërmendur”.

20. Këshilli i Emërimeve në Drejtësi (KED) me shkresat nr. 75 prot., - nr. 91 prot., datë 31.01.2025, ka kërkuar informacion pranë Gjykatave të Shkallës së Parë të Juridiksionit të Përgjithshëm, Gjykatës së Apelit të Juridiksionit të Përgjithshëm, Gjykatës së Posaçme të Shkallës së Parë për Korrupsionin dhe Krimin e Organizuar, Gjykatës së Posaçme të Apelit për Korrupsionin dhe Krimin e Organizuar, Gjykatës së Lartë. Në lidhje me kandidatin Alban Toro, i cili renditet i pari në listën e kandidatëve të përcjell për verifikim, gjykatat kanë përcjell informacionin vijues:

- Me shkresën nr. 611/1 prot., datë 10.02.2025, Gjykata e Lartë ka referuar: “.. *nuk rezulton që pranë kësaj gjykate të ketë të regjistruar çështje penale në emër të shtetasve ... Alban Toro..*”.
- Me shkresën nr. 183/1 prot., datë s’ka, të Gjykatës së Posaçme të Apelit për Korrupsionin dhe Krimin e Organizuar, përcillet informacioni se për kandidatin Alban Toro rezulton se: “..*a. Nuk rezulton të jetë regjistruar për shqyrtim asnjë çështje penale në ngarkim të tyre; b. Nuk janë dhënë vendime penale qoftë të formës së prerë, apo jo, në ngarkim të tyre*”.
- Me shkresën nr. 396/1 prot., datë 10.02.2025 të Gjykatës së Posaçme të Shkallës së Parë kundër Korrupsionit dhe Krimit të Organizuar, përcillet informacioni se për kandidatin Alban Toro rezulton se: “*Pas verifikimeve të kryera në sekretarinë e gjykatës, rezulton se në lidhje me shtetasit e sipërcituar nuk janë dhënë vendime penale si dhe aktualisht nuk kanë çështje penale në gjykim pranë Gjykatës së Posaçme të Shkallës së Parë për Korrupsionin dhe Krimin e Organizuar*”.
- Me shkresën nr. 2283/1 prot., datë 04.02.2025 të Gjykatës së Apelit të Juridiksionit të Përgjithshëm është evidentuar se: “*....për periudhën 2007-02.02.2025, nuk rezultojnë të regjistruara për shqyrtim/gjykuara çështje penale në ngarkim të shtetasve të mëposhtëm:... Alban Toro*” .
- Gjykata e Shkallës së Parë të Juridiksionit të Përgjithshëm Tiranë me shkresën nr. 467/3 prot., datë 19.02.2025 ka bërë me dije KED, se: “*...Nga verifikimi realizuar në Sistemin e Menaxhimit të Çështjeve Gjyqësore Penale për periudhën viti 2002 (vit kur fillon Sistemi i Menaxhimit të Çështjeve Gjyqësore Penal) deri në datën e kësaj shkrese, lidhur me shtetasit e sipërcituar nuk rezulton të jetë regjistruar ose dhënë ndonjë vendim themeli penale /masa sigurimi në ngarkim të tyre. Bëjmë me dije se, lidhur me kërkesat penale me objekt "Pushim procedimi penal ", këto kërkesa në Sistemin e Menaxhimit të Çështjeve Gjyqësore Penale, regjistrohen vetëm me numër procedimi dhe jo me emra dhe në këto kushte sistemi nuk gjeneron informacion të tillë, pa u specifikuar nga ana juaj numri i procedimit penal, nëse ka.....*”.
- Gjykata e Shkallës së Parë të Juridiksionit të Përgjithshëm Kukës me shkresën nr. 162/1 prot., datë 10.02.2025, ka bërë me dije KED, se: “*...Nga verifikimi i Sistemit të Menaxhimit të Çështjeve Gjyqësore, si dhe regjistrave fizik pranë sekretarisë gjyqësore, asnjë nga shtetasit listuar në shkresë nuk rezulton të ketë proces penal, të jetë duke u verifikuar, marr vendim zbatuar/revokuar/shuar masë sigurimi me karakter personal ose pasuror, apo të kenë vendime dënimi apo pafajësie, në ngarkim të tyre...*”.
- Gjykata e Shkallës së Parë të Juridiksionit të Përgjithshëm Dibër me shkresën nr. 114/1 prot., datë 04.02.2025 ka bërë me dije KED, se: “*...Në Gjykatën e Shkallës së Parë të*

Këshilli i Emërimeve në Drejtësi 2025

Adresa Postare : **GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.**

Adresa Elektronike : **info@ ked.gov.al** Numra telefonikë : **+355 4 2257302**

Juridiksionit të Përgjithshëm Dibër rezulton se kandidatët e sipër cituar, nuk kanë pasur çështje penale si dhe nuk kanë vendim penal të formës prerë ose jo ndaj tyre....”.

- Gjykata e Shkallës së Parë të Juridiksionit të Përgjithshëm Shkodër me shkresën nr. 211/1 prot., datë 10.02.2025 ka bërë me dije KED se: “...Nga kërkimi i indekseve dhe sistemeve, për llogari të shtetasve Alban Irfan Toro, ... nuk rezulton të kenë patur të regjistruar çështje penale pranë Gjykatës së Rrethit Gjyqësor Shkodër sot Gjykata e Shkallës së Parë të Juridiksionit të Përgjithshëm Shkodër. Po ashtu Gjykata e Rrethit Gjyqësor Shkodër sot Gjykata e Shkallës së Parë të Juridiksionit të Përgjithshëm Shkodër nuk rezulton të ketë dhënë vendime penale për shtetasit (me datëlindjet përkatëse) e mësipër listuar.....”.
- Gjykata e Shkallës së Parë të Juridiksionit të Përgjithshëm Lezhë me shkresën nr. 109/1 prot., datë 06.02.2025 ka bërë me dije KED se, “...nuk rezulton të ketë të dhëna, për procedime penale të filluara apo vendime penale të formës së prerë ose jo në të cilat përmendet emri i kandidatëve...”.
- Gjykata e Shkallës së Parë të Juridiksionit të Përgjithshëm Durrës me shkresën nr. 547/1 prot., datë 07.02.2025 ka bërë me dije KED se, “...Sa më sipër, nga verifikimet e kryera në Sistemin ICMIS dhe Zyra e Arkivës, sipas referencave të dhëna nga ju, kandidatët Alban Toro, ..., nuk rezultojnë të kenë qenë apo të jenë aktualisht si palë ndërgjyqëse në vendime apo procese gjyqësore në shqyrtim pranë Gjykatës së Shkallës së Parë të Juridiksionit të Përgjithshëm Durrës.....”.
- Gjykata e Shkallës së Parë të Juridiksionit të Përgjithshëm Elbasan me shkresën nr. 225/1 prot., datë 04.02.2025 ka bërë me dije KED se, “...Nga verifikimi në Sistemin ICMIS të Gjykatës së Shkallës së Parë të Juridiksionit të Përgjithshëm Elbasan, sipas listës emërore të kandidateve për gjyqtar në Gjykatën Kushtetuese nuk rezulton që këta shtetas të kenë marrë cilësinë e personit nën hetim në një procedimin penal, apo të jetë marrë vendim për të zbatuar/revokuar/shuarje mase sigurimi me karakter personal ose pasuror,apo të kenë procedime penale të mosfilluara, të pushuara apo të pezulluara vendime dënimi apo pafajësie...”.
- Gjykata e Shkallës së Parë të Juridiksionit të Përgjithshëm Berat me shkresën nr. 212/1 prot., datë 04.02.2025 ka bërë me dije KED se, “...Sipas verifikimeve të kryera në Sistemin e Menaxhimit të Çështjeve Gjyqësore (ICMIS), nuk rezulton çështje penale e regjistruar, pranë Gjykatës së Shkallës së Parë e Juridiksionit të Përgjithshëm Berat, në ngarkim të 8(tetë) shtetasve, të listuar në listën bashkëlidhur, të dërguar nga ana juaj.....”.
- Gjykata e Shkallës së Parë të Juridiksionit të Përgjithshëm Korçë me shkresën nr. 446/1 prot., datë 10.02.2025 ka bërë me dije KED se, “...Nga verifikimi i sistemit ICMIS nuk rezulton asnjë çështje gjyqësore për asnjë nga kandidatët..”.
- Gjykata e Shkallës së Parë të Juridiksionit të Përgjithshëm Fier me shkresën nr. 1070/1 prot., datë 05.02.2025 ka bërë me dije KED se, “...nuk rezultoi që për kandidatet për gjyqtar të Gjykatës Kushtetuese:... Alban Toro... të jenë regjistruar çështje penale, apo të jenë dhënë vendime pesate pranë kësaj gjykate në ngarkim të gre apo të kenë çështje për shqyrtim.”
- Gjykata e Shkallës së Parë të Juridiksionit të Përgjithshëm Vlorë me shkresën nr. 599/1 prot., datë 11.02.2025 ka bërë me dije KED se, “Nga verifikimi i kryer në Sistemin Informatik të Menaxhimit të Çështjeve Gjyqësore (ICMIS), dhe verifikimi i kryer në indekset penale të administruara pranë Zyrës së Arkivës pranë Gjykatës së Shkallës së Parë të Juridiksionit të Përgjithshëm Vlorë, nuk rezulton që pranë kësaj gjykate të jetë

Kësbilli i Emërimeve në Drejtësi 2025

Adresa Postare : **GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.**

Adresa Elektronike : **info@ ked.gov.al** Numra telefonikë : **+355 4 2257302**

dhënë vendim penal i formës së prerë apo të jetë regjistruar për shqyrtim çështje penale në ngarkim të shtetasve: Alban Toro;”

- Gjykata e Shkallës së Parë të Juridiksionit të Përgjithshëm Gjirokastrë me shkresën nr. 27 prot., datë 27.02.2025 ka bërë me dije KED se, “...nga lista prej 12 (dymbëdhjetë) kandidat asnjë nuk është proceduar pranë Gjykatën e Shkallës së Parë të Juridiksionit të Përgjithshëm Gjirokastrë.”.
- Gjykata e Shkallës së Parë të Juridiksionit të Përgjithshëm Sarandë me shkresën nr. 89/1 prot., datë 07.02.2025 ka bërë me dije KED se, “...nga verifikimi i kryer në Sistemin Informatik të Menaxhimit të Çështjeve pranë Gjykates së Shkallës së Parë të Juridiksionit të Përgjithshëm Sarandë rezulton se nuk ka asnjë çështje të rregjistruar apo vendim të dhënë në ngarkim të kandidatëve për gjyqtar në Gjykatën Kushtetuese, sipas listës së dërguar nga ana juaj....”.

21. Këshilli i Emërimeve në Drejtësi, me shkresën nr. 71 prot., datë 31.01.2025, i ka kërkuar informacion dhe Strukturës së Posaçme Kundër Korrupsionit dhe Krimit të Organizuar (në vijim SPAK), e cila, me shkresën nr. 7717 prot., datë 28.02.2025, ka kthyer përgjigje se:

“... ju konfirmojmë se pas verifikimeve të kryera në regjistrin e procedimeve penale të Prokurorisë së Posaçme kundër Korrupsionit dhe Krimit të Organizuar, nuk rezulton që të jetë regjistruar ndonjë procedim penal në ngarkim të kandidatëve të mëposhtëm, të cilët do të përfshihen në shortin për zgjedhjen si anëtarë të Gjykatës Kushtetuese: ... Alban Irfan Toro, datëlindja 09.03.1971, nr. personal H10307141M. ...

Pas verifikimeve të kryera në regjistrin e kallëzimeve të veprave penale të të Prokurorisë së Posaçme kundër Korrupsionit dhe Krimit të Organizuar, ju informojmë se ...

Në lidhje me shtetasin Alban Toro, rezultojnë këto të dhëna: Ndaj shtetasit Alban Toro, është regjistruar kallzimi Nr.11, i vitit 2021. Pas përfundimit të verifikimeve në lidhje me këtë kallëzim është vendosur mosfillim procedimi penal. Me vendimin Nr.88, datë 26.05.2021 të Gjykatës së Posaçme të Shkallës së Parë për Korrupsionin dhe Krimin e Organizuar është vendosur shfuqizim vendim mosfillimi dhe regjistrimi i procedimit penal me Nr.263, viti 2021.

Ky procedim penal është në fazën e hetimeve paraprake dhe emri i shtetasit Alban Toro nuk rezulton të jetë i regjistruar në regjistrin e njoftimit të veprave penale, në lidhje me këtë procedim.

Ndaj shtetasit Alban Toro është regjistruar kallëzimi Nr.307, viti 2021. Pas kryerjes së verifikimeve në lidhje me këtë kallëzim është vendosur mosfillim procedimi më datë 25.11.2021.”

Konstatohet se bashkë me informacionin e mësipërm, Prokuroria e Posaçme kundër Korrupsionit dhe Krimit të Organizuar ka përcjellë pranë KED, vendimin “Për mosfillimin e procedimit penal” datë 25.11.2021 të Prokurorisë së Posaçme kundër Korrupsionit dhe Krimit të Organizuar për kallëzimin penal nr. 307/2011, pasi fakti nuk përbën vepër penale;

22. Prokuroria e Posaçme kundër Korrupsionit dhe Krimit të Organizuar, në vijim të informacionit të kërkuar nga KED (lidhur me faktin nëse është ushtruar ankim ndaj vendimeve të Prokurorisë së Posaçme kundër Korrupsionit dhe Krimit të Organizuar për mosfillimin e procedimit penal datë 25.11.2021 (për kallëzimin nr. 307/2011) dhe informacion për gjendjen e procedimit penal nr. 263/2021), me shkresën nr. 13137 prot., datë 16.04.2025, ndër të tjera, ka bërë me dije KED se:

“Ndaj shtetasit Alban Toro, është regjistruar kallëzimi Nr.11, i vitit 2021. Pas përfundimit të verifikimeve në lidhje me këtë kallëzim është vendosur mosfillim procedimi penal.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Me vendimin Nr.88, datë 26.05.2021 të Gjykatës së Posaçme të Shkallës së Parë për Korrupsionin dhe Krimin e Organizuar është vendosur shfuqizim vendim mosfillimi dhe regjistrimi i procedimit penal me Nr.263, viti 2021.

Ky procedim penal është në fazën e hetimeve paraprake dhe emri i shtetasit Alban Toro nuk rezulton të jetë i regjistruar në regjistrin e njoftimit të veprave penale, në lidhje me këtë procedim.

Ndaj shtetasit Alban Toro është regjistruar kallëzimi Nr.307, viti 2021. Pas kryerjes së verifikimeve në lidhje me këtë kallëzim është vendosur mosfillim procedimi më datë 25.11.2021.

Ndaj vendimit të mosfillimit është ushtruar ankim nga ana e kallëzuesit. Me vendimin Nr.479 akti datë 28.12.2021, Gjykata e Posaçme e Shkallës së Parë për Korrupsionin dhe Krimin e Organizuar ka vendosur lënien në fuqi të vendimit të mosfillimit të Prokurorisë së Posaçme. Ndaj vendimit të Gjykatës së Posaçme të Shkallës së Parë është ushtruar ankim nga ana e kallëzuesit në Gjykatën e Posaçme të Apelit për Korrupsionin dhe Krimin e Organizuar, e cila me vendimin Nr.disponimi.38, datë 01.03.2022 ka vendosur miratimin e vendimit Nr.479 akti datë 28.12.2021, të Gjykatës së Posaçme të Shkallës së Parë për Korrupsionin dhe Krimin e Organizuar.”

23. Gjithashtu, bashkë me informacionin e mësipërm, Prokuroria e Posaçme kundër Korrupsionit dhe Krimin të Organizuar ka përcjellë pranë KED, aktet si vijon:

(i) Vendim nr. 479 akti, datë 28.12.2021 i Gjykatës së Posaçme të Shkallës së Parë për Korrupsionin dhe Krimin e Organizuar, me të cilin është lënë në fuqi vendimi i Prokurorisë së Posaçme kundër Korrupsionit dhe Krimin të Organizuar “Për mosfillimin e procedimit penal që i përket kallëzimit nr. 307, datë 11.11.2021”, datë 25.11.2021;

(ii) Vendim nr. 38 akti, datë 01.03.2022 i Gjykatës së Posaçme të Apelit për Korrupsionin dhe Krimin e Organizuar, me të cilin është miratuar vendimi nr. 479 akti, datë 28.12.2021 i Gjykatës së Posaçme të Shkallës së Parë për Korrupsionin dhe Krimin e Organizuar.

24. Këshilli i Emërimeve në Drejtësi, i ka kërkuar informacion Gjykatës së Posaçme të Shkallës së Parë për Korrupsionin (në vijim GJKKO), lidhur me vendimin nr. 88, datë 26.05.2021, të GJKKO me të cilin është vendosur shfuqizimi i vendimit të mosfillimit të procedimit penal dhe regjistrimi i procedimit penal me nr. 263, viti 2021, e cila me shkresën nr. 1266/1 prot., datë 03.04.2025, ka bërë me dije se: “Në përgjigje tuajës me nr. 185 prot, datë 27.03.2025, ku nga ana juaj kërkohet infomacion në lidhje me vendimin nr. 88, datë 26.05.2021, të Gjykatës së Posaçme të Shkallës së Parë për Korrupsionin dhe Krimin e Organizuar, pas verifikimeve në regjistrat përkatës nga sekretaria gjyqësore, rezulton se vendimi i sipërcituar është ankimuar nga Prokuroria e Posaçme kundër Korrupsionit dhe Krimin të Organizuar, në Gjykatën e Posaçme të Apelit për Korrupsionin dhe Krimin e Organizuar. Me vendimin nr. 172, datë 13.07.2021, Gjykata e Posaçme të Apelit për Korrupsionin dhe Krimin e Organizuar, ka vendosur: “Miratimin e vendimit nr.88, datë 26.05.2021, të Gjykatës së Posaçme te Shkallës së Parë për Korrupsionin dhe Krimin e Organizuar”. Bashkëlidhur ju vëmë në dispozicion një fotokopje të njehsuar me origjinalin të vendimit Nr.88, datë 26.05.2021, të Gjykatës së Posaçme te Shkallës së Parë për Korrupsionin dhe Krimin e Organizuar, me shënimet përkatëse.”

25. Gjithashtu, bashkë me shkresën e mësipërme është përcjellë vendimi nr. 88, datë 26.05.2021 i Gjykatës së Posaçme të Shkallës së Parë për Korrupsionin dhe Krimin e Organizuar, me të cilin është vendosur: “Pranimin e ankimit të ankuesit Shoqata e Avokatëve Antikorrupsion Shqiptare ndaj vendimit të mosfillimit të procedimit penal të datës 02.02.2021 të prokurorit të Prokurorisë së Posaçme Kundër Korrupsionit dhe Krimin të Organizuar. Urdhërohet prokurori i Prokurorisë së Posaçme Kundër Korrupsionit dhe Krimin të Organizuar, të regjistrojë procedimin penal për veprën penale të referuar në kallëzimin nr.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

11/2021 dhe të kryejë hetimet sipas drejtimit të përcaktuar në këtë vendim të kësaj gjykate. ...”, si dhe me shënimin që ky vendim është miratuar nga Gjykata e Posaçme e Apelit për Korrupsionin dhe Krimin e Organizuar me vendimin nr. 172, datë 13.07.2021.

26. Në vijim të verifikimit të kushteve dhe kriterëve ligjore të kandidimit, lidhur me verifikimin dhe kontrollin e integritetit të kandidatit Alban Toro, në zbatim të shkronjës “ç” të nenit 7/a të ligjit nr. 8577/2000, të nenit 236 të Ligjit nr. 115/2016, si edhe në zbatim të pikës 84 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi iu ka kërkuar informacion, me shkresën nr. 67 prot., datë 31.01.2025 Autoritetit Kombëtar për Sigurinë e Informacionit të Klasifikuar, me shkresën nr. 72 prot., datë 31.01.2025, Agjencisë së Mbikëqyrjes Policore (ish Shërbimi për Çështjet e Brendshme dhe Ankesave) pranë Ministrisë së Brendshme.

27. Autoriteti Kombëtar për Sigurinë e Informacionit të Klasifikuar me shkresën nr. 1343 prot., datë 12.03.2025, ka bërë me dije KED se: “Në përfundim të procedurave të verifikimit, autoritetet verifikuese na informojnë se nuk disponohen të dhëna për përfshirjen e z. Alban Irfan Toro, në veprimtari që çënojnë sigurinë kombëtare apo aktivitete të kundërligjshme. Për kandidatin e lartpërmendur, janë aplikuar standardet e parashikuara në nenin 38 “Standardet e kontrollit të figurës”, të ligjit nr.84/2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”.

28. Agjencia e Mbikëqyrjes Policore, pranë Ministrisë së Brendshme, me shkresën nr. 658/1 prot., datë 11.02.2025, ndër të tjerë, për kandidatin Alban Irfan Toro, ka bërë me dije KED se: “Nuk ka të dhëna për kontakte apo lidhje të tyre me persona të papërshtatshëm, apo të përfshirë në krimin e organizuar.”.

29. Gjithashtu, lidhur me verifikimin dhe kontrollin e integritetit, në zbatim të nenit 229 dhe 236 të Ligjit nr. 115/2016, të dispozitave të ligjit nr. 45/2015, si edhe në zbatim të pikës 85 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, me shkresën nr. 69 prot., datë 31.01.2025, Këshilli i ka dërguar, formularin e aplikimit përkatës të plotësuar sipas ligjit nga kandidati Alban Toro, për kompetencë dhe shqyrtim Autoritetit për Informimin mbi Dokumentet e Ish-Sigurimit të Shtetit.

30. Autoriteti për Informimin mbi Dokumentet e Ish-Sigurimit të Shtetit, me shkresat nr. 222/3 prot., datë 14.02.2025 dhe nr. 222/4 prot., datë 18.02.2025, ka dërguar vendimin nr. 71, datë 13.02.2025, me të cilin është vendosur: “... Për z. Alban Toro, ..., nga verifikimet e kryera deri tani, bazuar në përcaktimet e nenit 29 të Ligjit nr.45/2015 “Për të Drejtën e Informimit për Dokumentet e Ish-sigurimit të Shtetit të Republikës Popullore Socialiste të Shqipërisë”, i ndryshuar rezulton se: 1. Nuk kanë qenë persona në ndjekje për spiunazh apo terrorizëm; 2. Nuk kanë qenë bashkëpunëtor anëtar ose të favorizuar nga ish-Sigurimi i Shtetit. 3. Nuk figurojnë në dokumente të ish-Sigurimit të Shtetit, deri në 2 korrik 1991, sipas përcaktimeve të Nenit 29, pika 2 Ligjit Nr.45/2015, “Për të Drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë” i ndryshuar.”.

ii. Kontrolli mbi shtetësinë dhe zotësinë për të vepruar.

31. Në lidhje me kushtin e kandidimit të parashikuar nga neni 7/a, pika 1, shkronja “a” e ligjit nr. 8577/2000 pra që kandidati të ketë zotësi të plotë për të vepruar. Kandidati Alban Toro, me atësi Irfan, amësi Makbule, lindur më datë 09.03.1971, në Tiranë dhe banues në Tiranë, me nr. personal H10309141M, sipas certifikatës së lëshuar nga Zyra e Gjendjes Civile, rezulton me shtetësi shqiptare. Sipas vërtetimit nr. 332/1 prot., datë 20.01.2025 të Zyrës së

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Gjendjes Civile, Njësia Administrative nr. 2, Bashkia Tiranë (paraqitur nga vetë kandidati), si dhe përgjatë procedurës së verifikimit nuk ka rezultuar asnjë e dhënë që këtij kandidati t'i jetë hequr apo t'i jetë kufizuar zotësia për të vepruar.

iii. Kontrolli mbi arsimin e kandidatit

32. Në lidhje me kushtin e kandidimit të parashikuar nga pika 4 e nenit 125 të Kushtetutës dhe shkronja “b” e pikës 1 të nenit 7/a të ligjit Nr. 8577/2000, pra që kandidati të ketë mbaruar arsimin e lartë juridik, Diplomë e Nivelit të Dytë, nga dokumentacioni i shqyrtuar rezulton se kandidati Alban Toro, ka përfunduar studimet e larta në Universitetin e Tiranës në Fakultetin e Drejtësisë në periudhën 1991-1995, duke u diplomuar në datë 11.07.1995 si “Jurist”. Në zbatim të nenit 75 dhe 124 të ligjit nr. 80/2015 “Për Arsimin e Lartë dhe Kërkimin Shkencor në Institucionet e Arsimit të Lartë në Republikën e Shqipërisë”, ky lloj arsimimi kualifikohet si arsim i lartë juridik, Diplomë e Nivelit të Dytë.

iv. Kontrolli për ushtrim funksione politike/pozicione drejtuese në parti politike

33. Lidhur me kushtin e kandidimit të parashikuar nga pika 5 e nenit 125 të Kushtetutës dhe shkronja “c” e pikës 1 të nenit 7/a të ligjit nr. 8577/2000, pra që kandidati të mos ketë ushtruar funksione politike në administratën publike dhe të mos ketë mbajtur pozicione drejtuese në parti politike gjatë 10 viteve të fundit nga data e kandidimit, Këshilli i Emërimeve në Drejtësi me vendimin nr. 2, datë 23.02.2022, ka miratuar ndryshimet në vendimin nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, duke bërë pjesë të tij “Formularin e vetëdeklarimit nga kandidati për anëtar i Gjykatës Kushtetuese për pozicione drejtuese të mbajtura në parti politike gjatë 10 viteve të fundit nga data e kandidimit”, i cili u botua në fletoren zyrtare nr. 33, datë 01.03.2022. Këto ndryshime u kushtëzuan nga fakti se në praktikën e KED në vitet të mëparshme, partitë politike, nuk dërgonin informacionin e nevojshëm, duke ndikuar dhe vështirësuar marrjen e informacionit lidhur me ekzistencën ose jo të të dhënave që do të vërtetonin angazhimin e kandidatëve në ndonjë pozicion drejtues në parti politike. Në zbatim të këtij detyrimi kandidati Alban Toro ka dorëzuar të plotësuar formularin e vetëdeklarimit datë 18.01.2025, duke deklaruar se nuk ka pasur ndonjë pozicion drejtues në parti politike. Gjithashtu rezulton se gjatë periudhës së verifikimit nuk ka rezultuar ndonjë e dhënë ndryshe, apo ndonjë informacion nga persona të tretë në lidhje me këtë fakt.

33.1 Po ashtu, sillet në vëmendje se lidhur me kushtin e kandidimit të parashikuar nga pika 5 e nenit 125 të Kushtetutës dhe shkronja “c” e pikës 1 të nenit 7/a të ligjit nr. 8577/2000, pra që kandidati “të mos ketë ushtruar funksione politike në administratën publike gjatë 10 të fundit nga data e kandidimit” nuk rezulton që kandidati të ketë ushtruar funksione politike në administratën publike.

v. Kontrolli mbi përvojën profesionale të kandidatit në punë.

34. Lidhur me kushtin e kandidimit të parashikuar nga pika 4 e nenit 125 të Kushtetutës dhe shkronja “a” e pikës 2 të nenit 7/a të ligjit nr. 8577/2000, pra që kandidati të ketë të paktën 15 vjet përvojë pune si gjyqtar, prokuror, avokat, profesor ose lektor i së drejtës, nëpunës i

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

nivelit të lartë në administratën publike. Nga librezja e punës së kandidatit rezulton e dokumentuar përvoja e punës si vijon:

Nga data 10.08.1995 deri në datë 08.01.2003 – *Jurist në Byronë Juridike të Bankës Kombëtare Tregtare sha.*

Nga data 30.12.2002 deri në datë 09.01.2006 – *Përgjegjës i Sektorit Juridik dhe Burimeve Njerëzore, Agjencia e Sigurimit të Depozitave.*

Nga data 01.03.2007 deri në datë 12.11.2010 – *Drejtor Departamenti Juridik, shoqëria “Atlantik” sha.*

Nga data 12.12.2018 deri në datë 25.07.2024 – *Anëtar i Këshillit të Lartë Gjyqësor.*

35. Ndërsa, nga jetëshkrimi dhe dokumentacioni i paraqitur nga kandidati, rezulton se kandidati Alban Toro ka ushtruar veprimtari profesionale si avokat:

Janar 2006 – 2018 - *Avokat i punësuar dhe i vetëpunësuar i regjistruar me licence nr.716 dhe nipt K72316004E.*

Janar 2025 e në vijim – *Avokat.*

36. Në lidhje me verifikimin e kriterit të vjetërsisë, masave disiplinore dhe performancës në detyrë, në përputhje me kërkesat e nenit 7/a, pika 2 e Ligjit nr. 8577/2000 "Për organizimin dhe funksionimin e Gjykatës Kushtetuese" KED ka çmuar të nevojshme të verifikoj për aq sa rezulton e mundur të gjitha marrëdhëniet e punës, rrjedhimisht i është drejtuar institucioneve pranë të cilave rezulton se kandidati ka ushtruar marrëdhëniet e punësimit sipas pasqyrimit në librezën e punës dhe jetëshkrim. Për verifikimin e kushteve dhe kriterëve të tjera ligjore të kandidimit, në zbatim të shkronjave “b”, “c” dhe “d” të pikës 1, pikës 2 dhe 3 të nenit 7/a të Ligjit Nr. 8577/2000, të nenit 237 dhe 240 të ligjit nr. 115/2016, si edhe në zbatim të pikave 91 - 93 të vendimit nr. 4, datë 11.03.2019 të Këshillit të Emërimeve në Drejtësi “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, i ndryshuar, pavarësisht të dhënave të pasqyruara nga librezja e punës, jetëshkrimi apo edhe dokumentacionit shkresor të paraqitur nga kandidati, Këshilli për shkak të kryerjes së një hetimi të thelluar në drejtim të këtij kriteri, ka kryer një korrespondencë shkresore me të gjithë institucionet ku kandidati Alban Toro ka ushtruar veprimtari profesionale, duke kërkuar informacion për këto çështje: (i) marrjen e konfirmimit të periudhës kohore që ka ushtruar veprimtari profesionale pranë tyre; (ii) kërkimin e akteve të emërimit dhe të largimit nga detyra; (iii) konfirmimin dhe marrjen e të dhënave në lidhje me performancën në punë (masa disiplinore apo shkakun e largimit nga detyra); (iv) përshkrimin e detyrave funksionale dhe veprimtarinë ligjore që ka mbuluar në kryerjen e këtyre detyrave.

37. Lidhur me marrëdhënien e punësimit të kandidatit pranë Bankës Kombëtare Tregtare sha (BKT sha), si jurist në Byronë Juridike të bankës, BKT sha me shkresën nr. 1127/1 prot., datë 07.03.2025, ka bërë me dije KED se, “Z. Alban Toro ka filluar marrëdhënien e punës në Bankën Kombëtare Tregtare (BKT) më datë 10.08.1995, në pozicionin Jurist në Departamentin e Çështjeve Ligjore. Ai është larguar me dëshirë nga puna më datë 07.01.2001.”

38. Lidhur me marrëdhënien e punësimit të kandidatit pranë Agjencisë së Sigurimit të Depozitave, si Përgjegjës i Sektorit Juridik dhe Burimeve Njerëzore, Agjencia e Sigurimit të Depozitave me shkresën nr. 166/1 prot., datë 24.02.2025, ka bërë me dije KED se, “Në vijim të shkresës Tuaj me nr. 119 Prot, datë 14.02.2025 "Kërkesë për informacion", Ju bëjmë me dije se Z. Alban Irfan Toro ka qenë i punësuar pranë Agjencisë së Sigurimit të Depozitave nga data 31.12.2002 deri në datë 18.01.2006¹. Gjatë kësaj periudhe Z. Alban Toro ka ushtruar detyrën e Përgjegjës të Sektorit Juridik dhe Burimeve Njerëzore.

¹ Sipas librezës së punës periudha e punësimit është shënuar 30.12.2002 – 9.1.2006.

Detyrat dhe përgjegjësitë e Z. Toro në këtë pozicion kanë qenë: sigurimi i kryerjes korrekte dhe në kohë i punëve në sektor; zbatimi i detyrave duke bërë organizimin dhe koordinimin respektiv ndërmjet zyrave; konsulent i Këshillit Drejtues dhe Drejtorit të Përgjithshëm për veprimet e tyre nga pikëpamja ligjore; kontrolli dhe miratimi apo këshillimi për dokumenta të tilla si drafte, kontrata, letra këshillimi, marrëveshje të shkruara nga sektorët e ndryshëm të Agjencisë; njoftimi i kontrollit të brendshëm për të kryer një investigim në lidhje me shkelje të udhëzimeve, neglizhence dhe abuzime mbi veprimtarinë e punëmarrësve në sektor; vëzhgimi i ecurisë së personelit të sektorit, vlerësimi i tij: mbikëqyrja e punës, trajnimi i personelit, hartimi i planeve mbështetëse dhe dhënia e opinioneve rreth kuadrit të të drejtave të personelit, drejtorisë dhe administratës së burimeve njerëzore; delegimi i kompetencave dhe përgjegjësiwe respektive personelit, duke bërë një ndarje punësh produktive dhe të mjaftueshme mes tyre; sigurimi i kushteve për krijimtarinë dhe motivimin e personelit; intervistimi, seleksionimi i personelit të sektorit dhe dhënia e opinioneve për Zyrën e Burimeve Njerëzore, rregullimi i akordimit të lejeve vjetore të personelit, sipas procedurave të pushimit vjetor të paguar dhe në mënyrë që të mos ketë probleme në veprimtarinë e sektorit; inspektimi i raporteve të përgatitura nga Kontrolli i Brendshëm dhe veprimi sipas tyre; informimi i sektorëve për ndryshimet në legjislacion, veçanërisht përsa i përket veprimtarisë bankare; kontrolli, korigjimi dhe aprovimi i raporteve të hartuara në sektor; dhënia e aprovimit rreth subjekteve të tilla si ngritje në detyrë e personelit, pushimet vjetore, koha jashtë orarit dhe çdo e drejtë tjetër sipas rregulloreve të brendshme të krijuara nga Këshilli Drejtues; ushtrimi i autoritetit për dhënien e udhëzimeve për përgjegjësit e zyrave dhe vartësit për çështje që lidhen me sektorin.

Gjatë vijueshmërisë së punës së Z. Alban Toro nuk ka pasur vlerësime të performancës në detyrë të tij.

Agjencia e Sigurimit të Depozitave ka ndërprerë marrëdhëniet e punës me Z. Alban Irfan Toro në datë 18.01.2006, si pasojë e marrjes ndaj tij të masës disiplinore "Largim nga puna". Bashkëlidhur shkresa nr. 32R2 prot, datë 18.01.2006." Konstatohet se bashkë me këtë informacion është paraqitur si dokumentacion shkresa nr. 32R2 prot., datë 18.01.2006, me anë të së cilës kandidatit Alban Toro i është komunikuar masa disiplinore "pushim nga puna".

39. Në datë 12.03.2025, nëpërmjet komunikimit elektronik kandidati Alban Toro është njoftuar lidhur me informacionin e përcjellë nga Agjencia e Sigurimit të Depozitave, si dhe i është bërë e ditur e drejta e paraqitjes së qëndrimit të tij ose/dhe dokumentacioni, brenda një afati pesë ditor. Në të njëjtën datë kandidati Alban Toro ka dërguar elektronikisht (dhe më tej fizikisht) vendimin e formës së prerë nr. 1547, datë 20.03.2006 të Gjykatës së Rrethit Gjyqësor Tiranë (gjykuar në tre shkallët e gjyqësorit), nga i cili rezulton se është vendosur:

"Pranimin e padisë. Detyrimin e palës së paditur të dëmshpërblejë paditësin me një shumë sa paga e një viti pune për zgjidhje të menjëhershme dhe të pajustificuar të Kontratës së Punës. Detyrimin e palës së paditur të dëmshpërblejë paditësin me një shumë sa paga e një viti pune për zgjidhje të kontratës së punës pa shkaqe të arsyeshme. Detyrimin e palës së paditur t'i paguajë paditësit 2 muaj pagë për mosrespektim të afatit të njoftimit. Detyrimin e të paditurit t'i paguajë paditësit shpërblimin për vjetërsi prej 1 muaj e gjysëm pagë bazuar në Nenin 145/1 të Kodit të Punës. Detyrimi i i palës së paditur t'i paguaje paditësit shpërblimin për pushimet vjetore të vitit 2005."

Ky vendim është lënë në fuqi nga Gjykata e Apelit Tiranë me vendimin nr. 123, datë 08.02.2007.

Gjykata e Lartë me vendimin nr. 622, datë 23.04.2009 ka vendosur:

'Lënien në fuqi të vendimit nr. 123, datë 08.02.2007 të Gjykatës së Apelit Tiranë në lidhje me detyrimin e Agjencisë së Sigurimit të Depozitave të dëmshpërblejë paditësin me pagën

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

e një viti pune për zgjidhjen e menjëhershme e të pajustificuar të kontratës së punës për të paguar pagën për 2 muaj për mosrespektim të afatit të njoftimit, për të paguar shpërblimin për vjetërsi për një muaj e gjysëm pagë, për të paguar shpërblimin për pushimin vjetor të vitit 2005.

Ndryshimin e vendimit Nr.123, datë 08.02.2007 të Gjykatës së Apelit Tiranë dhe vendimit Nr.1547, datë 20.03.2006 të Gjykatës së Rrethit Gjyqësor Tiranë, dhe rrëzimin e kërimit të padisë së paditësit për detyrimin e palës së paditur për dëmshpërblimin me pagën e një viti pune për zgjidhje të kontratës së punës pa shkaqe të arsyeshme me motiv abuziv.”

40. Lidhur me marrëdhënien e punësimit të kandidatit pranë Shoqërisë së Sigurimeve “Atlantik” sha, si Drejtor i Departamentit Juridik, KED me shkresat nr. 118 prot., datë 14.02.2025 dhe nr. 238 prot., datë 28.05.2025 i është drejtuar shoqërisë së sigurimeve “Atlantik” sha, e cila me shkresën nr. 390/1 prot., datë 13.06.2025 ka bërë me dije Këshillin e Emërimeve në Drejtësi se “1. Z.Alban Toro ka qënë i punësuar pranë shoqërisë Atlantik-Shoqëri Sigurimi sha në pozicionin e Drejtorit Juridik të shoqërisë dhe si Avokat i shoqërisë për të mbrojtur interesat brenda dhe jashtë Shqipërisë (një rast specifik sigurimi në Zvicër) për periudhën Mars 2007 deri më Nëntor 2010. Z.Alban Toro është larguar nga Shoqëria Atlantik sh.a me kërkesën dhe dëshirën e tij. 2. Z.Alban Toro nuk ka patur vlerësime me shkrim të performancës në detyrë. 3. Z. Alban Toro ka ushtruar detyren e Avokatit me kohë të plotë pranë shoqërisë Atlantik- Shoqëri Sigurimi sh.a. 4. Z. Alban Toro gjatë vijueshmerisë së marrëdhënies së punës pranë shoqërisë Atlantik- Shoqëri Sigurimi sh.a nuk ka patur masë disiplinore.” Ndërkohë, referuar dokumentacionit shkresor të paraqitur nga kandidati në kohën e aplikimit, vërtetim nr. 812 prot., datë 15.12.2020 i lëshuar nga shoqëria “Atlantik” sha, rezulton se: “Me anë të këtij dokumenti vërtetojmë se z.Alban Toro ka qënë i punësuar pranë shoqërisë Atlantik- Shoqëri Sigurimi sha në cilësinë e Avokatit me kohë të plotë, në pozicionin e Drejtorit Juridik të shoqërisë për periudhën Mars 2007 deri me Nëntor 2010. Z.Alban Toro është larguar nga Shoqëria Atlantik me kërkesën dhe dëshirën e tij. Vërtetojmë se nga ana e shoqërisë Atlantik për periudhën e cituar më lartë për z.Alban Toro janë derdhur rregullisht në numrin e tij personal, të gjitha detyrimet tatimore që rrjedhin nga marrëdhënia me shoqërinë.”

41. Lidhur me ushtrimin e profesionit të avokatit konstatohet se, kandidati në kohën e aplikimit ka paraqitur si dokumentacion vërtetimin nr. 334 prot., datë 12.10.2020 të Dhomës së Avokatisë së Shqipërisë, nga i cili rezulton se: “... Z. Alban TORO është mbajtës i licensës së avokatit nr. 716 sipas regjistrit themeltar të avokatëve në Republikën e Shqipërisë. Ka ushtruar profesionin e avokatit për periudhën vjetore 2006 deri në vitin 2018, antar i dhomës vendore të avokatisë Tiranë. Për periudhën prej vitit 2019 e në vazhdim ka kaluar në statusin e avokatëve pasiv për shkak të papajtueshmërisë ligjore për ushtrimin e profesionit të avokatit, parashikuar sipas nenit 7 të ligjit 55/2018 “Për profesionin e avokatit në Republikën e Shqipërisë”, pasi ushtron funksione pranë administratës publike. Vërtetojmë se për periudhën e ushtrimit të profesionit të avokatit ka shlyer detyrimet financiare ndaj subjektit tonë dhe në ngarkim të tij nuk figurojnë masa apo procedime disiplinore.”

42. Lidhur me ushtrimin e profesionit të avokatit nga kandidati, Dhoma e Avokatisë së Shqipërisë me shkresën nr. 121 prot., datë 28.02.2025, ka bërë me dije KED se, “Zoti Alban Toro figuron në regjistrin e avokatëve të Republikës së Shqipërisë dhe është mbajtës i licensës me nr. 716, Dhoma Vendore e Avokatisë Tiranë. Ka ushtruar profesionin e avokatit deri në vitin 2018 dhe prej këtij viti e në vazhdim figuron në regjistrin e avokatëve pasiv për shkak të papajtueshmërisë ligjore për ushtrimin e profesionit të avokatit, parashikuar nga neni 7 i Ligjit nr. 55/2018, pasi ka kryer funksione pranë KLGJ. Gjatë ushtrimit të profesionit të avokatit, në ngarkim të tij nuk figurojnë masa disiplinore dhe nuk është iniciuar proces administrativ.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Lidhur me shlyerjen e detyrimeve financiare tatimore nuk kemi informacion pasi është tagër i Drejtorisë Rajonale tatimore.”

43. Me shkresën nr. 209 prot., datë 25.04.2025, KED i është ridrejtuar Dhomës së Avokatisë së Shqipërisë për të marrë informacion në lidhje me datën e fillimit të ushtrimit të profesionit të avokatit për kandidatin. Dhoma e Avokatisë së Shqipërisë me shkresën nr. 168 prot., datë 28.04.2025, ka bërë me dije KED se, *“Zoti Alban Toro figuron në regjistrin e avokatëve të Republikës së Shqipërisë dhe është mbajtës i licencës me nr. 716, Dhoma Vendore e Avokatisë Tiranë. Nga regjistrat e Dhomës së Avokatisë rezulton se ka ushtruar profesionin e avokatit prej datës 03/01/2002 deri në datën 30/11/2018, datë në të cilën është zgjedhur si anëtar i Këshillit të Lartë Gjyqësor, nga radhët e avokatisë. Zoti Toro ka fituar titullin avokat përpara viti 2002, vit në të cilin regjistri i avokatisë kaloi në administrim të Dhomës Kombëtare të Avokatisë. Përpara këtij viti ky regjistër ka qenë administruar prej Ministrisë së Drejtësisë dhe nuk na është vënë në dispozicion tonë edhe pas kërkesave tona të vazhdueshme, ndaj për këtë arsye ne nuk disponojmë të dhëna për avokatët e licencuar para vitit 2002. Gjatë viteve të ushtrimit të profesionit të avokatit, ndaj tij nuk figurojnë masa disiplinore apo kërkesa ankimore në proces. Lidhur me shlyerjen e detyrimeve tatimore, është Drejtoria Rajonale Tatimore Tiranë organi kompetent që jep informacione për çdo subjekt biznesi që operon në Republikën e Shqipërisë. Ne nuk kemi akses kontrolli në serverat tatimore.”*

44. Me shkresën nr. 237 prot., datë 28.05.2025, KED i është ridrejtuar Dhomës së Avokatisë së Shqipërisë për të marrë informacion në lidhje me datën e saktë të fillimit të ushtrimit të profesionit të avokatit për këtë kandidat, duke qenë se nga dokumentacioni dhe informacioni i përcjellë kanë rezultuar data të ndryshme për fillimin e ushtrimit të këtij profesioni. Dhoma e Avokatisë së Shqipërisë me shkresën nr. 190 prot., datë 28.04.2025, protokolluar në KED me nr. 237/1, datë 9.6.2025, ka bërë me dije se, *“Në përgjigje të kërkesës tuaj me shkresë nr. 237 Prot. të datës 28/05/2025, nëpërmjet së ciles kerkoni informacion në lidhje saktësimin e periudhës së ushtrimit të profesionit të avokatit nga ana e avokat z. Alban TORO, ju bëjmë me dije si më poshtë: Zoti Alban Toro figuron në regjistrin e avokatëve të Republikës së Shqipërisë dhe është mbajtës i licencës me nr. 716, Dhoma Vendore e Avokatisë Tiranë. Nga regjistrat e Dhomës së Avokatisë rezulton se e drejta e ushtrimit të profesionit të avokatit përfshihet prej periudhës 03/01/2006 deri në datën 30/11/2018, datë në të cilën është zgjedhur si antar i Këshillit të Lartë Gjyqësor, nga radhët e avokatisë. Njëkohësisht personi në fjalë ushtron profesionin e avokatit edhe për vitin 2025. Lidhur me pasaktësinë e të dhënave të dërguara me shkresën tonë nr. 168 prot. datë 28.04.2025 ka qenë një gabim në shkrim nga ana jonë.”*

45. Lidhur me ushtrimin e veprimtarive profesionale nga kandidati, KED i është drejtuar Drejtorisë së Përgjithshme të Tatimeve, duke kërkuar informacion, ndër të tjerë, për kandidatin Alban Toro se, kur është regjistruar si person fizik dhe në cilën periudhë ka ushtruar aktivitet, si dhe cili ka qënë objekti i veprimtarisë; nëse ka regjistrime të tjera pranë institucionit për këtë shtetas, nëse po, çfarë aktiviteti ka ushtruar; nëse ka shlyer detyrimet financiare tatimore, duke specifikuar funksionin për të cilin janë paguar këto detyrime. Drejtoria e Përgjithshme e Tatimeve, Drejtoria Rajonale Tiranë me shkresën nr. 3284/1 prot., datë 26.02.2025, ka bërë me dije KED se:

“1. Alban Irfan Toro me nr.ID H10309141M, dhe ditëlindje 09.03.1971, rezulton i regjistruar si individ për "Tatimin mbi të ardhurat individuale" prej datës 16.04.2020, dhe ka dorëzuar "Deklaratat Individuale Vjetore të të Ardhurave" (DIVA) për vitet 2019-2024. Bashkëlidhur printimi nga sistemi informatik i tatimeve i "Deklaratave individuale vjetore" të dorëzuara dhe situata informatike për "Detyrimet në kohë reale".

Sipas vetëdeklarimeve deri në datën e sotme nuk rezultojnë detyrime të papaguara.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Referuar të dhënave që disponojmë në sistem për Alban Irfan Toro me ID H10309141M rezulton i deklaruar i punësuar në subjektet sipas tabelës si më poshtë:

Nipt K51717016R, Subjekti Këshilli i Lartë Gjyqësor, Data e punësimit 25.12.2018, Data e largimit 26.07.2024

K72316004E, Subjekti Alban Toro, Data e punësimit 01.12.2011, Data e largimit. Bashkëlidhur printimi nga sistemi informatik i tatimeve "Ekstrakti historik i punonjësit" (me vlerat përkatëse për pagën bruto dhe TAP sipas periudhave për këtë individ).

Alban Irfan Toro me ID H10309141M nuk rezulton i regjistruar si person fizik, aksioner apo administrator i ndonjë subjekti në Drejtorinë Rajonale Tatimore Tiranë. Bashkëngjitur keni printimin nga sistemi C@ts të rezultatit të kërimit sipas personave të lidhur. ". (...)

Lidhur me vlerat e vetëdeklaruar nga këto individë sipas deklaratave DIVA të dorëzuara sqarojmë se; për të vërtetuar secilën vlerë të deklaruar për të ardhurat bruto dhe tatimet e deklaruar të paguara gjatë vitit, në ligjin 8438/1998 "Për tatimin mbi të ardhurat", i ndryshuar, neni 13/5 Mbajtja e dokumentacionit, pika 1 është përcaktuar se: "tatimpaguesi që bën deklaratën duhet të disponojë kopje origjinale të dokumentit që provon të ardhurën apo shpenzimin e zbritshëm ose fotokopje të njësuara nga institucioni lëshues i dokumentit. Originali i tyre, në çdo rast, ruhet në përputhje me legjislacionin fiskal dhe vihet në dispozicion të administratës tatimore, kur kërkohet prej saj".

Në informacionin e dhënë përsa i përket të ardhurave nga punësimi sqarojmë se; të dhënat që disponojmë sipas listëpagesave të deklaruar elektronikisht në Sistemin Informatik Tatimor c@ts, fillojnë nga muaji dhjetor 2011, ndërsa listëpagesat përpara periudhës tatimore dhjetor 2011, administrohen nga Drejtoria Rajonale e Sigurimeve Shoqërore." Gjithashtu, bashkë me këtë informacion është paraqitur si dokumentacion:

- Informacion i përgjithshëm nga sistemi C@TS për Alban Toro;*
- Deklarata Individuale Vjetore të të Ardhurave për individin Alban Toro datë 17.04.2020, 13.04.2021, 09.04.2022, 21.04.2023, 23.04.2024, 16.02.2025;*
- Detyrimet në kohë reale datë 25.02.2025 për subjektin Alban Toro, ku rezulton pa detyrime;*
- Ekstrakti historik i punonjësit Alban Toro me nr. personal H10309141M, me vlerat përkatëse për pagën bruto dhe TAP sipas periudhave për këtë subjekt, ku rezulton se: (i) subjekti Alban Toro, me nipt K72316004E, si tatimpagues për periudhën dhjetor 2011 – nëntor 2014, ka vlerë page bruto, pa TAP; për periudhën Dhjetor 2014 – Dhjetor 2018 nuk ka vlerë page bruto dhe as TAP; (ii) subjekti Alban Toro, me nipt K51717016R, tatimpagues Këshilli i Lartë Gjyqësor për periudhën Dhjetor 2018 – Korrik 2024, ka vlerë page bruto dhe TAP.*
- Historik i punësimit sipas Esig027 për Alban Toro me nr. personal H10309141M, ku rezulton: (i) Këshilli i Lartë Gjyqësor data e punësimit 25.12.2018 data e largimit 26.07.2024; (ii) subjekt Alban Toro (nipt K72316004E), me status pasiv në datë 20.12.2018, datë punësimi 01.12.2011.*

46. Lidhur me ushtrimin e veprimtarisë profesionale nga kandidati, KED ka kërkuar informacion me shkresën nr. 235 prot., datë 28.05.2025 pranë Institutit të Sigurimeve Shoqërore lidhur me pagesën e kontributeve për kandidatin për periudhën 2002-2018, si i vetëpunësuar/i punësuar dhe subjektin punëdhënës. Instituti i Sigurimeve Shoqërore me shkresën nr. 5590/1 prot., datë 4.6.2025, ka bërë me dije KED se, "Instituti i Sigurimeve Shoqërore administrojnë të dhëna për kontributet e paguara për sigurimet shoqërore dhe shëndetësore, të cilat mbledhen dhe dërgohen nga Drejtoria e Përgjithshme e Tatimeve nëpërmjet eebService, të dhëna të cilat i disponojmë nga viti 2012 e në vazhdim. Për sa më

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

sipër, lutemi të gjeni bashkëlidhur informacionin e kërkuar për periudhën 01.01.2012 e deri në muajin sipas formularit bashkëlidhur për shtetasin, Alban Irfan Toro me ID H10309141M.” Ndërsa me shkresën nr. 5590/2 prot., datë 4.6.2025 drejtuar Drejtorisë së Arkivit Qendror Lundër, Instituti i Sigurimeve Shoqërore bën me dije se, “Për sa më sipër, Drejtoria e Arkivit Qendror të Sigurimeve Shoqërore të përpunojë informacionin e kërkuar lidhur me të dhënat e historikut kontributiv për periudhën para vitit 2012 dhe të dërgojë pranë "Këshillit të Emërimeve në Drejtësi", informacionin e plotë për të gjithë periudhën ku rezultojnë të paguara kontributet për sigurimet shoqërore.” Gjithashtu, bashkë me këtë informacion është paraqitur si dokumentacion: vërtetim për bazën e vlerësuar datë 02.06.2025, nga i cili rezulton se, kandidati Alban Toro ka derdhur kontributet mujore mbi bazën e pagës bruto mujore si person fizik (avokat) për periudhën Janar 2012 – Dhjetor 2018, ndërsa për periudhën Dhjetor 2018 – Korrik 2024, nga Këshilli i Lartë Gjyqësor.

47. Lidhur me ushtrimin e veprimtarisë profesionale nga kandidati KED ka kërkuar informacion me shkresën nr. 236 prot., datë 28.05.2025 pranë Qendrës Kombëtare të Biznesit (lidhur me të dhënat për subjektin Alban Toro për niptin K72316004E, periudhën e pushimit apo/dhe pezullimit të aktivitetit), e cila nuk ka përcjellë informacion pranë KED. Nga ana tjetër, Këshilli për shkak të kryerjes së një hetimi të thelluar në drejtim të këtij aktiviteti ka verifikuar dhe administruar të dhëna në lidhje me subjektin person fizik Alban Toro, me nipt K72316004E, në faqen zyrtare të Qendrës Kombëtare të Biznesit, ku sipas të dhënave të ekstraktit tregtar historik datë 6.6.2025 rezulton se:

Gjendja e regjistrimit fillestar. Numri Unik i identifikimit të subjektit (NUIS): K72316004E; Emri i subjektit: Alban Toro; Forma Ligjore: Person Fizik; Data e regjistrimit: 16.11.2007; Fusha e veprimtarisë: Avokati; Vendi i ushtrimit të aktivitetit: Tiranë....; Të dhëna që njoftohen vullnetarisht: Emri Tregtar Alban Toro; Statusi: Pezulluar. Regjistrimi fillestar CN-104185-11-07.

Historiku i regjistrimit.

Data e regjistrimit 02.03.2010: ... Statusi ishte (“Aktiv”) u bë (“Pezulluar”)....

Data e regjistrimit 20.09.2011: ... Arsytet e hapjes së çështjes: Aktivizim Aktiviteti. Statusi ishte (“Pezulluar”) u bë (“Aktiv”)....

Data e regjistrimit 27.02.2018: ... Arsytet e hapjes së çështjes: Pezullim aktiviteti, nga data 26.02.2018 – pa afat. Statusi ishte (“Aktiv”) u bë (“Pezulluar”)....

Data e regjistrimit 24.04.2018: ... Arsytet e hapjes së çështjes: Aktivizim Aktiviteti. Statusi ishte (“Pezulluar”) u bë (“Aktiv”)....

Data e regjistrimit 21.12.2018: ... Arsytet e hapjes së çështjes: Pushim i përkohshëm i aktivitetit pa afat nga data 20.12.2018. Statusi ishte (“Aktiv”) u bë (“Pezulluar”)....

48. Lidhur me marrëdhënien e punësimit të kandidatit pranë Këshillit të Lartë Gjyqësor si anëtar i Këshillit, KED ka kërkuar informacion pranë Këshillit të Lartë Gjyqësor, Inspektoratit të Lartë të Drejtësisë dhe Kuvendit të Republikës së Shqipërisë.

49. Këshilli i Lartë Gjyqësor me shkresën nr. 1102/1 prot., datë 28.02.2025, ka bërë me dije KED se, “Z. Alban Toro, me vendim nr. 18/2018 të Kuvendit të Shqipërisë zgjidhet Anëtar i Këshillit të Lartë Gjyqësor. Me vendim nr. 4, datë 20.12.2018 të Këshillit të Lartë Gjyqësor deklarohet krijimi i Këshillit të Lartë Gjyqësor më datë 12.12.2018. Me vendim nr. 361, datë 29.07.2024 të Këshillit të Lartë Gjyqësor deklarohet mbarimi i mandatit të Anëtarit të Këshillit të Lartë Gjyqësor dhe përfundimi i qëndrimit në detyrë më datë 26.07.2024. Vjetërsia në ushtrimin e funksionit të magjistratit (gjyqtar) është 5 vite, 7 muaj, 14 ditë. Ndaj Zotit Toro nuk rezultojnë masa disiplinore.”

50. Inspektori i Lartë të Drejtësisë, me shkresën nr. 1102/1 prot., datë 28.02.2025, ka bërë me dije KED se, “Në kuadër të përcaktimeve të nenit 194 të ligjit 115/2016 "Për organet e

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

qeverisjes së sistemit të drejtësisë", të ndryshuar, sqarojmë se për kandidatët për gjyqtarë në Gjykatën Kushtetuese ..., z. Alban Toro, ..., nga verifikimi i kryer për periudhën 2020-2025, nuk ka filluar hetim disiplinor dhe për rrjedhojë Inspektori i Lartë i Drejtësisë, nuk ka paraqitur asnjë kërkesë për procedim disiplinor drejtuar organeve kompetente për shqyrtimin e saj."

51. Kuvendi i Republikës së Shqipërisë, me shkresën nr. 411/1 prot., datë 27.02.2025, ka bërë me dije KED se, *"Në kuadër të përcaktimeve të nenit 194 të ligjit 115/2016 "Për organet e qeverisjes së sistemit të drejtësisë", të ndryshuar, sqarojmë se për kandidatët për gjyqtarë në Gjykatën Kushtetuese ..., z. Alban Toro, ..., nga verifikimi i kryer për periudhën 2020-2025, nuk ka filluar hetim disiplinor dhe për rrjedhojë Inspektori i Lartë i Drejtësisë, nuk ka paraqitur asnjë kërkesë për procedim disiplinor drejtuar organeve kompetente për shqyrtimin e saj...."*

52. Lidhur me ushtrimin e veprimtarisë profesionale si pedagog me kohë të pjesshme në Departamentin e Gazetarisë të Universitetit të Tiranës sipas jetëshkrimit të kandidatit, KED ka kërkuar informacion me shkresën nr. 239 prot., datë 28.05.2025 pranë Universitetit të Historisë dhe Filologjisë, Universiteti i Tiranës, i cili me shkresën nr. 236/1 prot., datë 11.06.2025 ka bërë me dije KED se kandidati Alban Toro nuk është pjesë e stafit të këtij Fakulteti.

53. Në datë 30.05.2025, KED i ka bërë me dije në rrugë elektronike kandidatit të drejtën për të përcjellë parashtrime me shkrim dhe shpjegime, brenda një afati 5 ditor si dhe nëse vlerësohet e nevojshme të dokumenteve mbështetës, lidhur me përputhshmërinë e veprimtarisë së tij profesionale me kërkesat e nenit 7/a, pika 2 e ligjit nr. 8577/2000 dhe pikës 97/1 të vendimit nr. 4, datë 11.03.2019 të KED, i ndryshuar. Gjithashtu nisur nga të dhënat e konstatuara në dokumentacion janë kërkuar sqarime edhe lidhur me periudhën konkrete (datë/muaj/vit) të ushtrimit të profesionit të avokatit, si i vetëpunësuar dhe i punësuar, si dhe dokumentacion mbështetës. Gjithashtu, nga shqyrtimi i jetëshkrimit ka rezultuar e shënuar si përvojë profesionale: *Drejtor i Departamentit Juridik, Burimeve Njerëzore dhe Marrëdhënieve me Publikun pranë Agjencisë së Sigurimit të Depozitave për periudhën Janar 2003- Janar 2006*, ndërkohë sipas librezës së punës përvoja profesionale rezulton: *Përgjegjës i Sektorit Juridik dhe Burimeve Njerëzore pranë Agjencisë së Sigurimit të Depozitave për periudhën 30.12.2002-09.01.2006*. Si rrjedhojë janë kërkuar sqarime dhe nëse vlerësohet dokumentacion mbështetës, edhe lidhur me këtë konstatim.

54. Brenda afatit të caktuar nga relatorja, në datë 01.06.2025, kandidati ka depozituar në rrugë elektronike parashtrime me shkrim mbi qëndrimin e tij lidhur me përshtatshmërinë e funksioneve të ushtruara nga ana e tij me kërkesat e ligjit dhe aktit nënligjor. Në datë 05.06.2025, parashtrimet e kandidatit dhe provat bashkëlidhur i janë dërguar anëtareve të Këshillit. Kandidati ka vlerësuar se plotëson kriterin ligjor të përvojës profesionale sipas ligjit. Gjithashtu, me email-in e mësipërm kandidati ka paraqitur edhe dokumentacion sikundër vendime gjyqësore nga të cilat rezulton si përfaqësues i palëve (si avokat), ekstrakt historik i Bankës Kombëtare Tregtare sha, nxjerrje llogarie periudha 1.01.2007-31.12.2007 pranë BKT sha, kërkesë datë 15.09.2019 drejtuar avokatit Avni Shehu nga Alban Toro si person i lidhur me subjektin e rivlerësimit (bashkëshortes E.T), për mënyrën e pagesës së kryer nga zyra në vitet 2007-2010, kur ka punuar me kohë të pjesshme për marrëdhëniet juridike që trajtonin me bankat; kthim përgjigje datë 18.09.2019 të avokatit Avni Shehu drejtuar subjektit Alban Toro.

55. Për sa më lart, në zbatim të pikës 4 të nenit 125 të Kushtetutës dhe shkronja "a" e pikës 2 të nenit 7/a të ligjit nr. 8577/2000, pra që kandidati të ketë *të paktën 15 vjet përvojë pune si gjyqtarë, prokurorë, avokatë, profesorë ose lektorë të së drejtës, nëpunës të nivelit të lartë në administratën publike*, nga dokumentacioni i shqyrtuar, rezulton i provuar fakti se kandidati Alban Toro ka vjetërsi pune për periudhat e saktësuara si më poshtë:

Këshilli i Emërimeve në Drejtësi 2025

Adresa Postare : ***GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.***

Adresa Elektronike : ***info@ ked.gov.al*** Numra telefonikë : ***+355 4 2257302***

10.08.1995 - 08.01.2003, Jurist në Byronë Juridike të Bankës Kombëtare Tregtare sha, 7 vite, 4 muaj e 29 ditë;
 30.12.2002 - 09.01.2006, Përgjegjës i Sektorit Juridik dhe Burimeve Njerëzore, Agjencia e Sigurimit të Depozitave, 3 vite e 10 ditë;
 01.03.2007 - 12.11.2010, Drejtor Departamenti Juridik, shoqëria e sigurimeve “Atlantik” sha, 3 vite, 8 muaj, 11 ditë;
 09.01.2006 – 02.03.2010², Avokat, 4 vjet, 1 muaj e 21 ditë;
 20.09.2011³ – 27.02.2018, Avokat, 6 vjet, 5 muaj, 7 ditë;
 24.04.2018⁴ – 12.12.2018, Avokat, 7 muaj, 18 ditë.
 12.12.2018 - 25.07.2024, Anëtar i Këshillit të Lartë Gjyqësor, 5 vite, 7 muaj e 13 ditë.

IV. Vlerësimi i Këshillit të Emërimeve në Drejtësi

56. Këshilli i Emërimeve në Drejtësi, duke u bazuar në dispozitat ligjore dhe ato nënligjore normative të zbatueshme për çështjen në shqyrtim, si edhe në rrethanat e faktit që rezultojnë në aktet që përmban dosja e kandidatit, vlerëson se duhet të procedojë me vendim për lejimin e kandidatit Alban Toro për vendin vakant në Gjykatën Kushtetuese të shpallur nga Gjykata e Lartë në datën 11.12.2024.

57. Në pikën 4 dhe 5 të nenit 125 të Kushtetutës, parashikohet se :

“4. Gjyqtarët e Gjykatës Kushtetuese duhet të kenë arsim të lartë juridik, të paktën 15 vjet përvojë pune si gjyqtarë, prokurorë, avokatë, profesorë ose lektorë të së drejtës, nëpunës të nivelit të lartë në administratën publike, me një veprimtari të spikatur në fushën e së drejtës kushtetuese, të drejtave të njeriut ose në sfera të tjera të së drejtës.

5. Gjyqtari nuk duhet të ketë mbajtur funksione politike në administratën publike ose pozicione drejtuese në një parti politike gjatë 10 vjetëve të fundit përpara kandidimit. Kriteret e tjera, si dhe procedura për emërimin dhe zgjedhjen e gjyqtarëve të Gjykatës Kushtetuese rregullohen me ligj”.

58. Në pikën 1 dhe 2 të nenit 7/a të ligjit nr. 8577/2000, parashikohet se:

“1. Gjyqtari i Gjykatës Kushtetuese mund të zgjidhet shtetasi shqiptar që përmbush këto kushte:

a) të ketë zotësi të plotë për të vepruar;

b) të ketë mbaruar arsimin e lartë juridik, Diplomë e Nivelit të Dytë;

c) të mos ketë ushtruar funksione politike në administratën publike dhe të mos ketë mbajtur pozicione drejtuese në parti politike gjatë 10 viteve të fundit nga data e kandidimit;

ç) të mos jetë në procedim penal dhe të mos jetë dënuar me burgim për kryerjen e një vepre penale;

d) të mos jetë larguar nga detyra për shkaqe disiplinore dhe të mos ketë masë disiplinore në fuqi;

dh) të ketë kaluar me sukses procesin e kontrollit dhe verifikimit të pasurisë së tij personale dhe të familjarëve të tij, sipas ligjit.

2. Kandidati që përmbush kushtet e parashikuara në pikën 1 të këtij neni, duhet të plotësojë edhe këto kritere:

a) të ketë përvojë pune jo më pak se 15 vjet si gjyqtar, prokuror, avokat, profesor ose lektor i së drejtës, jurist i nivelit të lartë në administratën publike;

² Në datë 02.03.2010 pezulluar statusi në QKB.

³ Në datë 20.09.2011 aktivizuar statusi në QKB, pezulluar në datë 27.02.2018.

⁴ Në datë 24.04.2018 aktivizuar statusi në QKB, pezulluar në datë 21.12.2018.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

b) të ketë një veprimtari të njohur në fushën e të drejtës kushtetuese, të drejtave të njeriut ose sfera të tjera të së drejtës;

c) të jetë vlerësuar për aftësitë profesionale dhe integritetin etik e moral.”.

59. Për sa i përket procedurës së verifikimit të pasurisë, në përfundim të veprimeve të kontrollit të ushtruar në zbatim të nenit 235 të ligjit nr.115/2016, të ligjit nr. 9049/2003 dhe ligjit nr. 9367/2005, ILDKPKI ka përcjell aktin e kontrollit të plotë të Deklaratës së Pasurisë dhe Interesave Privatë e kandidatit për pozicione të ndryshme në institucionet e sistemit të drejtësisë, Alban Toro për Gjyqtar në Gjykatën Kushtetuese, me shkresën nr. 18/25 prot., datë 21.05.2025, ku është konkluduar për kandidatin Alban Toro.

60. Në përfundim të analizës së hollësishme financiare të kryer mbi bazën e gjetjeve të sigurara nga informacionet e dërguara nga institucione publike dhe subjekte private, lidhur me deklarimin e pasurisë dhe interesave private të kandidatit Alban Toro, ILDKPKI në raportin e paraqitur ka ardhur në përfundimet se:

a) deklarimi është i saktë në përputhje me ligjin,

b) ka burime financiare të ligjshme për të justifikuar pasurinë,

c) nuk ka kryer fshehje të pasurisë,

d) nuk ka kryer deklarim të rremë,

e) nuk gjendet në situatën e konfliktit të interesave.

61. Mbi bazën e verifikimeve të kryera, Këshilli i rezulton se nuk ka gjetje që tregojnë të dhëna të padeklaruara apo mospërputhje të tyre me të dhënat e treguara në deklaratimet e bëra nga kandidati Alban Toro pranë ILDKPKI me Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë.

62. Gjithashtu, Këshilli e vlerësoi të plotë dhe ezaurues, sipas kërkesave të legjislacionit në fuqi, hetimin e thelluar dhe analizat e hollësishme financiare të realizuara nga ILDKPKI, sikurse edhe përfundimet e këtij institucioni mbi kontrollin e pasurisë dhe interesave private të kandidatit Alban Toro.

63. Për këto arsye, në zbatim të shkronjës “dh” të pikës 1 të nenit 7/a të ligjit nr. 8577/2000 dhe të nenit 235 të ligjit nr. 115/2016, Këshilli vjen në përfundimin se kandidati Alban Toro ka “kaluar me sukses procesin e kontrollit dhe verifikimit të pasurisë së tij personale dhe të familjarëve të tij”. Për rrjedhojë, në zbatim të nenit 235 të ligjit nr.115/2016, ky kandidat nuk gjendet në kushtet e ndalimit të kandidimit për sa i përket verifikimit të pasurisë.

64. Lidhur me verifikimin dhe kontrollin e integritetit, kandidati Alban Toro ka dorëzuar në afat formularin e vetëdeklarimit sipas ligjit nr. 138/2015 “Për garantimin e integritetit të personave që zgjidhen, emërohen ose ushtrojnë funksione publike”, të cilin, Këshilli ia ka përcjellë për verifikim dhe kompetencë sipas ligjit Prokurorisë së Përgjithshme.

65. Prokuroria e Përgjithshme, Drejtoria e Marrëdhënieve Juridiksionale me Jashtë, në përgjigjen e kthyer me shkresën nr. 206/11 prot., datë 12.02.2025, ka bërë me dije, Këshillin e Emërimeve në Drejtësi, se: “...nga kontrolli i kryer në sistemin elektronik IMPRO.... i cili përmban të dhëna nga viti 2015 e në vazhdim për shtetasit e tjerë të cituar në shkresën tuaj, nuk rezulton asnjë praktikë e regjistruar në sistemin IMPRO”.

66. Prokuroria e Përgjithshme, Drejtoria e Koordinimit Institucional, Sektori i Dekriminalizimit në vijim të shkresës së saj me nr. 206/2 prot., datë 05.02.2025 ka përcjell nga me shkresën nr. 206/21 prot., datë 10.03.2025, vendimin e datës 07.03.2025 “Për mospranimin e kërkesës për verifikim” të të dhënave të plotësuar në zbatim të ligjit nr. 138/2015, në formularin e vetëdeklarimit datë 18.01.2025 për kandidatin Alban Toro.

67. Në lidhje me këtë kandidat, në përgjigje të kërkesës së Këshillit të Emërimeve në Drejtësi, dërguar me shkresën nr. 70 prot., datë 31.01.2025, Drejtoria e Përgjithshme e

Këshilli i Emërimeve në Drejtësi 2025

Adresa Postare : ***GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.***

Adresa Elektronike : ***info@ ked.gov.al*** Numra telefonikë : ***+355 4 2257302***

Burgjeve, me shkresën nr. 1616/1 prot., datë 07.02.2025, ka informuar se: “...rezultojnë pa shënime në sistem...”.

68. Gjithashtu Prokuroria e Përgjithshme, ka përcjell shkresën nr. 206/44 prot., datë 29.04.2025, lidhur me të gjithë informacionin e ardhur nga Prokuroritë pranë Gjykatave të Rretheve Gjyqësore me Juridiksion të Përgjithshëm, ku në thelb rezulton se: “... nuk rezulton të kenë çështje penale në hetim apo të jenë dënuar me vendim të formës së prerë...”.

69. Në lidhje me këtë kandidat, në përgjigje të kërkesës së Këshillit të Emërimeve në Drejtësi, dërguar me shkresën nr. 73 prot., datë 31.01.2024, Drejtoria e Përgjithshme të Gjendjes Civile e cila me shkresën nr. 1166/1 prot., datë 12.02.2025, ka kthyer përgjigje se: “Nuk ka ndryshime”.

70. Në lidhje me këtë kandidat, në përgjigje të kërkesës së Këshillit të Emërimeve në Drejtësi, dërguar me shkresën nr. 68 prot., datë 31.01.2025, Drejtoria e Përgjithshme e Policisë së Shtetit, me shkresën nr. 543/4 prot., datë 10.02.2025, ka informuar se: “Nga verifikimet e kryera rezultoi se shtetasit.... nuk janë ndaluar apo arrestuar në flagrancë nga strukturat e Policisë së Shtetit për kryerjen e ndonjë veprë penale; nuk figurojnë të regjistruar me identitet tjetër; nuk rezultojnë të kthyer deportiv apo të dëbuar nga territori i ndonjë shteti tjetër; nuk rezulton të kenë urdhër kërkimi ndërkombëtar nga ndonjë autoritet gjyqësor i huaj”.

71. Këshilli i Emërimeve në Drejtësi, me shkresat nr. 75 prot., - nr. 91 prot., datë 31.01.2025, ka kërkuar informacion pranë Gjykatave të Shkallës së Parë të Juridiksionit të Përgjithshëm, Gjykatës së Apelit të Juridiksionit të Përgjithshëm, Gjykatës së Posaçme të Shkallës së Parë Për Korrupsionin dhe Krimin e Organizuar, Gjykatës së Posaçme të Apelit për Korrupsionin dhe Krimin e Organizuar, Gjykatës së Lartë, të cilat me shkresa respektive kanë referuar në thelb se, “nuk rezulton që të ketë të regjistruar çështje penale në emër të shtetasit Alban Toro”.

72. Në vijim, Këshilli i Emërimeve në Drejtësi me shkresën nr. 71 prot., datë 31.01.2025, i ka kërkuar informacion dhe Strukturës së Posaçme Kundër Korrupsionit dhe Krimin të Organizuar (në vijim SPAK), e cila, me shkresën nr. 7717 prot., datë 28.02.2025, ka kthyer përgjigje se,

“... ju konfirmojmë se pas verifikimeve të kryera në regjistrin e procedimeve penale të Prokurorisë së Posaçme kundër Korrupsionit dhe Krimin të Organizuar, nuk rezulton që të jetë regjistruar ndonjë procedim penal në ngarkim të kandidatëve të mëposhtëm, të cilët do të përfshihen në shortin për zgjedhjen si anëtarë të Gjykatës Kushtetuese: ... Alban Irfan Toro, datëlindja 09.03.1971, nr. personal H10307141M. ...

Pas verifikimeve të kryera në regjistrin e kallëzimeve të veprave penale të të Prokurorisë së Posaçme kundër Korrupsionit dhe Krimin të Organizuar, ju informojmë se ...

Në lidhje me shtetasin Alban Toro, rezultojnë këto të dhëna: Ndaj shtetasit Alban Toro, është regjistruar kallzimi Nr.11, i vitit 2021. Pas përfundimit të verifikimeve në lidhje me këtë kallëzim është vendosur mosfillim procedimi penal. Me vendimin Nr.88, datë 26.05.2021 të Gjykatës së Posaçme të Shkallës së Parë për Korrupsionin dhe Krimin e Organizuar është vendosur shfuqizim vendim mosfillimi dhe regjistrimi i procedimit penal me Nr.263, viti 2021.

Ky procedim penal është në fazën e hetimeve paraprake dhe emri i shtetasit Alban Toro nuk rezulton të jetë i regjistruar në regjistrin e njoftimit të veprave penale, në lidhje me këtë procedim.

Ndaj shtetasit Alban Toro është regjistruar kallëzimi Nr.307, viti 2021. Pas kryerjes së verifikimeve në lidhje me këtë kallëzim është vendosur mosfillim procedimi më datë 25.11.2021.”. Gjithashtu, bashkë me informacionin e mësipërm, Prokuroria e Posaçme kundër Korrupsionit dhe Krimin të Organizuar ka përcjellë pranë KED, vendimin “Për mosfillimin e

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

procedimit penal” datë 25.11.2021 të Prokurorisë së Posaçme kundër Korrupsionit dhe Krimit të Organizuar për kallëzimin penal nr. 307/2011, pasi fakti nuk përbën veprë penale;

73. Prokuroria e Posaçme kundër Korrupsionit dhe Krimit të Organizuar, në vijim të informacionit të kërkuar nga KED (*lidhur me faktin nëse është ushtruar ankim ndaj vendimeve të Prokurorisë së Posaçme kundër Korrupsionit dhe Krimit të Organizuar për mosfillimin e procedimit penal datë 25.11.2021 (për kallëzimin nr. 307/2021) dhe informacion për gjendjen e procedimit penal nr. 263/2021*), me shkresën nr. 13137 prot., datë 16.04.2025, ndër të tjera, ka bërë me dije KED se:

“Ndaj shtetasit Alban Toro, është regjistruar kallëzimi Nr.11, i vitit 2021. Pas përfundimit të verifikimeve në lidhje me këtë kallëzim është vendosur mosfillim procedimi penal.

Me vendimin Nr.88, datë 26.05.2021 të Gjykatës së Posaçme të Shkallës së Parë për Korrupsionin dhe Krimin e Organizuar është vendosur shfuqizim vendim mosfillimi dhe regjistrimi i procedimit penal me Nr.263, viti 2021.

Ky procedim penal është në fazën e hetimeve paraprake dhe emri i shtetasit Alban Toro nuk rezulton të jetë i regjistruar në regjistrin e njoftimit të veprave penale, në lidhje me këtë procedim.

Ndaj shtetasit Alban Toro është regjistruar kallëzimi Nr.307, viti 2021. Pas kryerjes së verifikimeve në lidhje me këtë kallëzim është vendosur mosfillim procedimi më datë 25.11.2021.

Ndaj vendimit të mosfillimit është ushtruar ankim nga ana e kallëzuesit. Me vendimin Nr.479 akti datë 28.12.2021, Gjykata e Posaçme e Shkallës së Parë për Korrupsionin dhe Krimin e Organizuar ka vendosur lënien në fuqi të vendimit të mosfillimit të Prokurorisë së Posaçme. Ndaj vendimit të Gjykatës së Posaçme të Shkallës së Parë është ushtruar ankim nga ana e kallëzuesit në Gjykatën e Posaçme të Apelit për Korrupsionin dhe Krimin e Organizuar, e cila me vendimin Nr.disponimi.38, datë 01.03.2022 ka vendosur miratimin e vendimit Nr.479 akti datë 28.12.2021, të Gjykatës së Posaçme të Shkallës së Parë për Korrupsionin dhe Krimin e Organizuar.” Gjithashtu, bashkë me informacionin e mësipërm, Prokuroria e Posaçme kundër Korrupsionit dhe Krimit të Organizuar ka përcjellë pranë KED, aktet si vijon: vendim nr. 479 akti, datë 28.12.2021 i Gjykatës së Posaçme të Shkallës së Parë për Korrupsionin dhe Krimin e Organizuar, me të cilin është lënë në fuqi vendimi i Prokurorisë së Posaçme kundër Korrupsionit dhe Krimit të Organizuar “Për mosfillimin e procedimit penal që i përket kallëzimit nr. 307, datë 11.11.2021”, datë 25.11.2021; vendim nr. 38 akti, datë 01.03.2022 i Gjykatës së Posaçme të Apelit për Korrupsionin dhe Krimin e Organizuar, me të cilin është miratuar vendimi nr. 479 akti, datë 28.12.2021 i Gjykatës së Posaçme të Shkallës së Parë për Korrupsionin dhe Krimin e Organizuar.

74. Këshilli i Emërimeve në Drejtësi, i ka kërkuar informacion Gjykatës së Posaçme të Shkallës së Parë për Korrupsionin (në vijim GJKKO), lidhur me vendimin nr. 88, datë 26.05.2021, të GJKKO me të cilin është vendosur shfuqizimi i vendimit të mosfillimit dhe regjistrimi i procedimit penal me nr. 263, viti 2021, e cila me shkresën nr. 1266/1 prot., datë 03.04.2025, ka bërë me dije KED se: *“Në përgjigje tuajës me nr. 185 prot, datë 27.03.2025, ku nga ana juaj kërkohet infomacion në lidhje me vendimin nr. 88, datë 26.05.2021, të Gjykatës së Posaçme të Shkallës së Parë për Korrupsionin dhe Krimin e Organizuar, pas verifikimeve në rregjistrat përkatës nga sekretaria gjyqësore, rezulton se vendimi i sipërcituar është ankimuar nga Prokuroria e Posaçme kundër Korrupsionit dhe Krimit të Organizuar, në Gjykatën e Posaçme të Apelit për Korrupsionin dhe Krimin e Organizuar. Me vendimin nr. 172, datë 13.07.2021, Gjykata e Posaçme të Apelit për Korrupsionin dhe Krimin e Organizuar, ka vendosur: "Miratimin e vendimit nr.88, datë 26.05.2021, të Gjykatës së Posaçme te Shkallës së Parë për Korrupsionin dhe Krimin e Organizuar". Bashkëlidhur ju vëmë në dispozicion një*

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

fotokopje të njehsuar me origjinalin të vendimit Nr.88, datë 26.05.2021, të Gjykatës së Posaçme të Shkallës së Parë për Korrupsionin dhe Krimin e Organizuar, me shënimet përkatëse.”. Gjithashtu, bashkë me shkresën e mësipërme është përcjellë vendimi nr. 88, datë 26.05.2021 i Gjykatës së Posaçme të Shkallës së Parë për Korrupsionin dhe Krimin e Organizuar, me të cilin është vendosur: *“Pranimin e ankimit të ankuesit Shoqata e Avokatëve Antikorrupsion Shqiptare ndaj vendimit të mosfillimit të procedimit penal të datës 02.02.2021 të prokurorit të Prokurorisë së Posaçme Kundër Korrupsionit dhe Krimin të Organizuar. Urdhërohet prokurori i Prokurorisë së Posaçme Kundër Korrupsionit dhe Krimin të Organizuar, të regjistrojë procedimin penal për veprën penale të referuar në kallëzimin nr. 11/2021 dhe të kryejë hetimet sipas drejtimit të përcaktuar në këtë vendim të kësaj gjykate. ...”*, si dhe me shënimin që ky vendim është miratuar nga Gjykata e Posaçme e Apelit për Korrupsionin dhe Krimin e Organizuar me vendimin nr. 172, datë 13.07.2021.

75. Nga të dhënat e konstatuara ndonëse rezulton se, ndaj kandidatit Alban Toro është paraqitur kallëzim pranë Prokurorisë së Posaçme kundër Korrupsionit dhe Krimin të Organizuar, e cila bazuar në vendimin e GJKKO ka regjistruar procedimin penal nr. 263, viti 2021, nga ana tjetër, sipas informacionit të evidentuar më lart, Prokuroria e Posaçme ka bërë me dije KED se, *“Ky procedim penal është në fazën e hetimeve paraprake dhe emri i shtetasit Alban Toro nuk rezulton të jetë i regjistruar në regjistrin e njoftimit të veprave penale, në lidhje me këtë procedim.”*. Në këto rrethana, konstatohet se, ndonëse Prokuroria e Posaçme ka regjistruar procedimin penal nr. 263, viti 2021, emri i kandidatit Alban Toro nuk rezulton të jetë i regjistruar në regjistrin e njoftimit të veprave penale, në lidhje me këtë procedim. Për rrjedhojë kandidati Alban Toro nuk gjendet në kushtet e ndalimit të kandidimit sipas nenit 7/a, pika 1, shkronja “ç” të ligjit nr. 8577/2000.

76. Në vijim të procedurave të verifikimit të integritetit, kandidati Alban Toro ka dorëzuar në afat formularin e aplikimit “Për informim përpara emërimit/zgjedhjes në poste të larta” parashikuar në ligjin nr. 45/2015, të cilin, Këshilli ia ka përcjellë për verifikim dhe kompetencë sipas ligjit Autoritetit për Informimin mbi Dokumentet e Ish-Sigurimit të Shtetit.

77. Autoriteti për Informimin mbi Dokumentet e Ish-Sigurimit të Shtetit, me shkresat nr. 222/3 prot., datë 14.02.2025 dhe nr. 222/4 prot., datë 18.02.2025, ka përcjellë pranë Këshillit të Emërimeve në Drejtësi vendimin nr. 71, datë 13.02.2025, me të cilin është vendosur: *“ ... Për z. Alban Toro, ..., nga verifikimet e kryera deri tani, bazuar në përcaktimet e nenit 29 të Ligjit nr.45/2015 "Për të Drejtën e Informimit për Dokumentet e Ish-sigurimit të Shtetit të Republikës Popullore Socialiste të Shqipërisë", i ndryshuar rezulton se: 1. Nuk kanë qenë persona në ndjekje për spiunazh apo terrorizëm; 2. Nuk kanë qenë bashkëpunëtor anëtar ose të favorizuar nga ish-Sigurimi i Shtetit. 3. Nuk figurojnë në dokumente të ish-Sigurimit të Shtetit, deri në 2 korrik 1991, sipas përcaktimeve të Nenit 29, pika 2 Ligjit Nr.45/2015, "Për të Drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë" i ndryshuar.”*

78. Nisur nga rezultatet e kontrollit të ushtruar nga Autoriteti për Informimin mbi Dokumentet e Ish-Sigurimit të Shtetit, Këshilli i Emërimeve në Drejtësi vjen në përfundimin se kandidati Alban Toro, krahas plotësimit të saktë të formularit përkatës të aplikimit, përmbush kushtet e parashikuara nga ligji nr. 45/2015 për pastërtinë e figurës së funksionarit kushtetues në lidhje me sjelljen dhe veprimtarinë tij përpara muajit korrik 1991. Për rrjedhojë, lidhur me këtë kriter, në zbatim të nenit 236 të ligjit nr. 115/2016, ky kandidat nuk gjendet në kushtet që mund të sjellin ndalimin e kandidimit.

79. Gjithashtu, Këshilli i Emërimeve në Drejtësi verifikoi, nëpërmjet informacionit të sjellë sipas ligjit nga organe kompetente ligjzbatuese si Drejtoria e Sigurisë së Informacionit të Klasifikuar sot Autoriteti Kombëtar Për Sigurinë e Informacionit të Klasifikuar dhe Shërbimi

Këshilli i Emërimeve në Drejtësi 2025

Adresa Postare : ***GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.***

Adresa Elektronike : ***info@ ked.gov.al*** Numra telefonikë : ***+355 4 2257302***

i Kontrollit të Çështjeve të Brendshme dhe Ankesave, sot Agjencia e Mbikëqyrjes Policore, nëse kandidati Alban Toro *“ka lidhje ose kontakte të papërshtatshme me personat e përfshirë në krimin e organizuar ose me persona të dyshuar të krimit të organizuar”*. Ky verifikim përbën standardin kushtetues dhe ligjor tashmë të vendosur për figurën dhe integritetin e funksionarëve kushtetues të sistemit të drejtësisë, përpara zgjedhjes dhe gjatë ushtrimit të funksionit, pas ndryshimeve të Kushtetutës në vitin 2016, duke pasur parasysh ato të përcaktuara edhe në nenin DH të Aneksit të Kushtetutës, si edhe në ligjet e tjera të nxjerra në pajtim me të, përfshirë ligjin nr. 84/2016, pra mbi të njëjtat standarde dhe interpretim të këtij kriteri në procesin e rivlerësimit kalimtar të gjyqtarëve dhe prokurorëve.

80. Autoriteti Kombëtar për Sigurinë e Informacionit të Klasifikuar me shkresën nr. 1343 prot., datë 12.03.2025, ka bërë me dije KED se: *“Në përfundim të procedurave të verifikimit, autoritetet verifikuese na informojnë se nuk disponohen të dhëna për përfshirjen e z. Alban Irfan Toro, në veprimtari që çenojnë sigurinë kombëtare apo aktivitete të kundërligjshme. Për kandidatin e lartpërmendur, janë aplikuar standardet e parashikuara në nenin 38 “Standardet e kontrollit të figurës”, të ligjit nr.84/2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”*.

81. Ndërsa, Shërbimi për Çështjet e Brendshme dhe Ankesave, sot Agjencia e Mbikëqyrjes Policore, me shkresën nr. 658/1 prot., datë 11.02.2025, ndër të tjerë, për kandidatin Alban Irfan Toro ka informuar se: *“Nuk ka të dhëna për kontakte apo lidhje të tyre me persona të papërshtatshme, apo të përfshirë në krimin e organizuar”*.

82. Këshilli i Emërimeve në Drejtësi, bazuar në njohjen dhe shqyrtimin e informacionit të klasifikuar të dërguar nga agjencitë ligjzbatuese, vjen në përfundimin se, edhe për këtë kriter, në zbatim të nenit 236 të ligjit nr. 115/2016, kandidati Alban Toro nuk gjendet në kushtet që mund të sjellin ndalimin e kandidimit.

83. Për verifikimin e kushteve dhe kriterëve të tjera ligjore të kandidimit, në zbatim të shkronjave “b”, “c” dhe “d” të pikës 1, pikës 2 dhe 3 të nenit 7/a të ligjit nr. 8577/2000, të nenit 237 dhe 240 të Ligjit nr. 115/2016, si edhe në zbatim të pikave 91-93 të Vendimit të Këshillit të Emërimeve në Drejtësi nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, i ndryshuar, Këshilli shqyrtoi dokumentacionin e depozituar nga vetë kandidati Alban Toro në momentin e kandidimit pranë organit të emërtesës që ka shpallur vendin vakant, shpjegimet dhe dokumentet shtesë të paraqitura nga kandidati mbi kërkesën e Këshillit, si edhe përgjigjet nga informacionet e kërkuara nga institucionet ku kandidati ka ushtruar funksione publike.

84. Në lidhje me kushtin e kandidimit të parashikuar nga pika 4 e nenit 125 të Kushtetutës dhe shkronja “b” e pikës 1 të nenit 7/a të ligjit nr. 8577/2000, pra që kandidati të ketë *mbaruar arsimin e lartë juridik, Diplomë e Nivelit të Dytë*, nga dokumentacioni i shqyrtuar rezulton se kandidati Alban Toro, ka përfunduar studimet e larta në Universitetin e Tiranës, në Fakultetin e Drejtësisë, në periudhën 1991-1995, duke u diplomuar “Jurist”, në datë 11.07.1995. Në zbatim të nenit 75 dhe 124 të ligjit nr. 80/2015 *“Për Arsimin e Lartë dhe Kërkimin Shkencor në Institucionet e Arsimit të Lartë në Republikën e Shqipërisë”*, ky lloj arsimimi kualifikohet si arsim i lartë juridik, Diplomë e Nivelit të Dytë.

85. Në pikën 4 të nenit 125 të Kushtetutës dhe shkronjën “a” të pikës 2 të nenit 7/a të ligjit nr. 8577/2000, përcaktohet që kandidati të ketë *të paktën 15 vjet përvojë pune si gjyqtarë, prokurorë, avokatë, profesorë ose lektorë të së drejtës, nëpunës të nivelit të lartë në administratën publike*. Nga dokumentacioni i shqyrtuar, përfshirë jetëshkrimin, librezën e punës, shkresa e vërtetime të lëshuara nga organet kompetente të emërtesës etj., që janë të administruara në dosjen e kandidimit, ndërmjet të tjerave, rezulton se kandidati Alban Toro ka ushtruar veprimtari profesionale si:

Këshilli i Emërimeve në Drejtësi 2025

Adresa Postare : **GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.**

Adresa Elektronike : **info@ ked.gov.al** Numra telefonikë : **+355 4 2257302**

10.08.1995 - 08.01.2003, *Jurist në Byronë Juridike të Bankës Kombëtare Tregtare sha*, 7 vite, 4 muaj e 29 ditë;

30.12.2002 - 09.01.2006, *Përgjegjës i Sektorit Juridik dhe Burimeve Njerëzore, Agjencia e Sigurimit të Depozitave*, 3 vite e 10 ditë;

01.03.2007 - 12.11.2010, *Drejtor Departamenti Juridik, shoqëria e sigurimeve "Atlantik" sha*, 3 vite, 8 muaj, 11 ditë;

09.01.2006 – 02.03.2010⁵, *Avokat*, 4 vjet, 1 muaj e 21 ditë;

20.09.2011⁶ – 27.02.2018, *Avokat*, 6 vjet, 5 muaj, 7 ditë;

24.04.2018⁷ – 12.12.2018, *Avokat*, 7 muaj, 18 ditë.

12.12.2018 - 25.07.2024, *Anëtar i Këshillit të Lartë Gjyqësor*, 5 vite, 7 muaj e 13 ditë.

86. Sa i përket përvojës profesionale të kandidatit si avokat, Këshilli çmon se kjo përvojë profesionale, me përjashtim të periudhës së pezullimit të aktivitetit në Qendrën Kombëtare të Biznesit është në përputhje me kërkesat ligjore të nenit 7/a, pika 2 të ligjit nr. 8577/2000, ku përcaktohet që kandidati të ketë të paktën 15 vjet përvojë pune si avokat. Në analizë të legjislacionit që rregullon profesionin e avokatit⁸, rezulton se profesioni i avokatit në Republikën e Shqipërisë mund të ushtrohet nga çdo person, që ka fituar titullin profesional "Avokat" dhe që përmbush kriteret e tjera të parashikuara në legjislacionin në fuqi në kohën e ushtrimit të aktivitetit si avokat. Për të konsideruar se një person ka ushtruar profesionin e avokatit mbahen parasysh kushtet dhe kriteret e legjislacionit në fuqi në kohën e ushtrimit të veprimtarisë së avokatit, si dhe ushtrimi efektivisht i këtij profesioni. Gjithashtu, referuar legjislacionit për profesionin e avokatit nuk rezulton papajtueshmëri midis ushtrimit të profesionit të avokatit dhe punësimit njëkohësisht në subjekt privat. Avokati ndërpret ushtrimin e profesionit vetëm në rastin kur është emëruar në një pozicion, i cili krijon papajtueshmëri me ushtrimin e profesionit të avokatit, e konkretisht si gjyqtar, prokuror, noter, përmbarues gjyqësor apo funksione në organe publike. Vetëm në këto raste avokati duhet të heqë dorë nga ushtrimi i profesionit të tij, për aq kohë sa është në marrëdhënie pune me administratën publike. Nga ana tjetër pezullimi i aktivitetit në Qendrën Kombëtare të Biznesit do të thotë që avokati e ka ndërprerë ushtrimin e profesionit të avokatit dhe për pasojë kjo periudhë pezullimi nuk mund t'i konsiderohet përvojë si avokat.

87. Në këtë kontekst, Këshilli në verifikimin e përmbushjes së kriterit të parashikuar në nenin 7/a, pika 2, shkronja "a" të ligjit 8577/2000, *pra që të ketë përvojë pune jo më pak se 15 vjet si avokat*, vlerësoi se kandidati Alban Toro, ka përvojë si avokat mbi bazën e provave (të dhënave) objektive që evidentojnë ushtrimin e këtij aktiviteti profesional përmbi 11 vjet, gjatë periudhës 09.01.2006 – 02.03.2010; 20.09.2011 – 27.02.2018; 24.04.2018 – 12.12.2018.

88. Po ashtu përvoja profesionale disa vjeçare e kandidatit si anëtar i Këshillit të Lartë Gjyqësor është plotësisht në përputhje me kërkesat ligjore të nenit 7/a, pika 2, të ligjit nr. 8577/2000, i ndryshuar dhe vendimit nr. 4, datë 11.03.2019 të KED.

89. Bazuar në gjetjet e cituara më sipër, duke patur në konsideratë përvojën profesionale të kandidatit si avokat dhe anëtar pranë Këshillit të Lartë Gjyqësor, Këshilli vlerëson se, kandidati Alban Toro ka ushtruar së paku për 15 vjet veprimtari profesionale nga ato të parashikuara si kusht për lejimin e kandidimit nga pika 4 e nenit 125 të Kushtetutës dhe shkronja "a" e pikës 2 të nenit 7/a të ligjit nr. 8577/2000.

⁵ Në datë 02.03.2010 pezulluar statusi në QKB.

⁶ Në datë 20.09.2011 aktivizuar statusi në QKB, pezulluar në datë 27.02.2018.

⁷ Në datë 24.04.2018 aktivizuar statusi në QKB, pezulluar në datë 21.12.2018.

⁸ Shih ligjin nr. 7827, datë 31.5.1994 "Për avokatinë në Republikën e Shqipërisë"; ligjin nr. 9109, datë 17.07.2003 "Për profesionin e avokatit në Republikën e Shqipërisë", ndryshuar me ligjin nr. 9795, datë 23.07.2007; ligjin nr. 55/2018 "Për profesionin e avokatit në Republikën e Shqipërisë" (në fuqi).

90. Në pikën 5 të nenit 125 të Kushtetutës dhe shkronjës “c” të pikës 1 të nenit 7/a të ligjit nr. 8577/2000, në të cilën përcaktohet që kandidati të mos ketë ushtruar funksione politike në administratën publike gjatë 10 viteve të fundit nga data e kandidimit. Sikurse parashtrohet më sipër, si edhe nga jetëshkrimi dhe aktet e administruara në dosjen e kandidimit për veprimtaritë e tjera të ushtruara, Këshilli konstaton se, kandidati Alban Toro nuk ka ushtruar funksione politike në administratën publike gjatë periudhës së përcaktuar nga ligji. Për rrjedhojë kandidati Alban Toro nuk gjendet në kushtet e ndalimit të kandidimit sipas dispozitave të sipërcituara.

91. Gjithashtu, në pikën 5 të nenit 125 të Kushtetutës dhe shkronjës “c” të pikës 1 të nenit 7/a të ligjit nr. 8577/2000, përcaktohet që kandidati të mos ketë mbajtur pozicione drejtuese në parti politike gjatë 10 viteve të fundit nga data e kandidimit. Nga shqyrtimi i jetëshkrimit dhe të dhënave që rezultojnë nga aktet e administruara në dosjen e kandidimit, sikurse dhe nga formulari i vetëdeklarimit të paraqitur nga kandidati Alban Toro, Këshilli konstaton se, kandidati nuk ka mbajtur pozicione drejtuese në parti politike gjatë periudhës së përcaktuar nga ligji. Për rrjedhojë kandidati Alban Toro nuk gjendet në kushtet e ndalimit të kandidimit sipas dispozitave të sipërcituara.

92. Në shkronjën “d” të pikës 1 të nenit 7/a të ligjit nr. 8577/2000, si kusht kandidimi përcaktohet që kandidati *të mos jetë larguar nga detyra për shkaqe disiplinore dhe të mos ketë masë disiplinore në fuqi*. Nga dokumentacioni i shqyrtuar, përfshirë jetëshkrimin, librezën e punës, shkresa e vërtetime të lëshuara nga organet kompetente të emërtesës etj., që janë të administruara në dosjen e kandidimit, Këshilli vlerëson se kandidati Alban Toro nuk rezulton të jetë larguar nga detyra për shkaqe disiplinore. Po kështu, nuk rezulton që kandidati të ketë masa disiplinore në fuqi. Nga të dhënat e konstatuara ndonëse rezulton se kandidati Alban Toro është larguar nga detyra si Përgjegjës i Sektorit Juridik dhe Burimeve Njerëzore pranë Agjencisë së Sigurimit të Depozitave, nga ana tjetër ky largim është konsideruar me vendim gjyqësor të formës së prerë si zgjidhje e marrëdhënies së punës në mënyrë të menjëhershme dhe të pajustificuar. Për rrjedhojë kandidati Alban Toro nuk gjendet në kushtet e ndalimit të kandidimit sipas kësaj dispozite.

93. Për sa analizohet dhe arsyetohet më sipër, bazuar në gjetjet dhe të dhënat e konstatuara gjatë procedurës së verifikimit që rezultojnë nga aktet dhe dokumentacionin që përmban dosja e kandidimit, në interpretim dhe zbatim të ligjit të zbatueshëm për kushtet dhe kriteret e kandidimit për gjyqtar në Gjykatën Kushtetuese, Këshilli i Emërimeve në Drejtësi vjen në përfundimin se duhet të vendoset lejimi i kandidimit të kandidatit Alban Toro, në vendin vakant për gjyqtar në Gjykatën Kushtetuese të shpallur nga Gjykata e Lartë në datën 11.12.2024.

PËR KËTO ARSYE:

Në mbështetje të pikës 1 të nenit 149/d të Kushtetutës, të 7/ç të ligjit nr. 8577/2000, “*Për organizimin dhe funksionimin e Gjykatës Kushtetuese të Republikës së Shqipërisë*”, i ndryshuar, të nenit 229, 235, 236, 237 të ligjit nr. 115/2016, “*Për organet e qeverisjes së sistemit të drejtësisë*”, i ndryshuar, si edhe pikave 17, 25, 26, 33, 57, 58, 79, 91 të vendimit të KED-së nr. 4, datë 11.03.2019, “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, i ndryshuar, Këshilli i Emërimeve në Drejtësi,

Këshilli i Emërimeve në Drejtësi 2025

Adresa Postare : **GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.**

Adresa Elektronike : **info@ked.gov.al** Numra telefonikë : **+355 4 2257302**

VENDOSI:

1. Lejimin e kandidimit të kandidatit Alban Toro, në vendin vakant për gjyqtar në Gjykatën Kushtetuese, shpallur nga Gjykata e Lartë në datën 11.12.2024.
2. Në zbatim të nenit 238 të Ligjit nr. 115/2016, ky vendim i njoftohet kandidatit Alban Toro.
3. Kandidati Alban Toro ka të drejtën e ankimit në Gjykatën Administrative të Apelit, jo më vonë se 5 ditë nga dita e njoftimit të vendimit të arsyetuar.
4. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

ANËTAR

Zv/KRYETARE

KRYETAR

Ilir Toska

Marjana Semini

Sokol Sadushi

ANËTARE

ANËTARE ZËVENDËSUESE

ANËTARE

Alma Muça

Elvana Çiçolli

Enkela Vlora

ANËTARE

ANËTAR ZËVENDËSUES

ANËTAR ZËVENDËSUES

Irma Balli

Genti Xholi

Bezart Kaçkini

Këshilli i Emërimeve në Drejtësi 2025

Adresa Postare : *GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.*

Adresa Elektronike : **info@ked.gov.al** Numra telefonikë : **+355 4 2257302**